


史忠正公集附錄





叢書集成

初編

主編者
王雲五

商務印書館發行



史忠正公集

附錄



3 0645 2095 4

史可法著

史忠正公集

本館據畿輔叢書
本排印初編各叢
書僅有此本

史忠正公集卷首

江南揚州府甘泉縣學生員 臣史開純恭錄

賜諡諭旨

乾隆四十年十一月初十日、奉上諭、崇獎忠貞、所以風勵臣節、然自昔累朝嬗代、凡勝國死事之臣、罕有錄予易名者、惟我世祖章皇帝定鼎之初、於崇禎末殉難之大學士范景文等二十人、特恩錫諡、仰見聖度如天、軫恤遺忠、實爲亙古曠典、第當時僅徵摺傳聞、未暇遍爲搜訪、故得邀表章者、止有此數、迨久而遺事漸彰、復經論定、今明史所載、可考而知也、至若史可法之支撐殘局、力矢孤忠、終蹈一死以殉、又如劉宗周、黃道周等之立朝審諤、抵觸僉壬、及遭際時艱、臨危授命、均足稱一代完人、爲褒揚所當及、其他或死守城池、或身殞行陣、與夫俘擒駢儻、視死如歸者、爾時王旅徂征、自不得不申法令以明順逆、而事後平情而論、若而人者、皆無愧於疾風勁草、卽自盡以全名節、其心亦並可矜憐、雖福王不過倉猝偏安、唐桂二王、並且流離竄跡、已不復成其爲國、而諸人茹苦相從、捨生取義、各能忠於所事、亦豈可令其湮沒不彰、自宜稽考史書、一體旌諡、其或諸生章布、及不知姓名之流、並能慷慨輕生者、議諡固難概及、亦當令俎豆其鄉、以昭軫慰、嘗恭讀我太祖實錄載薩爾濟之戰、明楊鎬等集兵二十萬、四路分出、侵伐興京、我太祖太宗及貝勒大臣等、統勁旅數千、殲戮明兵過半、一時良將、如劉綎、杜松等皆沒於陣、近曾親

製書事一篇。用揚祖烈而示傳信。惟時王業肇基。其抗我顏行者。原當多爲獮薙。然迹其冒竊櫻鋒。竭忠效命。未嘗不爲嘉憫。又若明社將移。孫承宗。盧象昇等之抵拒王師。身膏原野。而周遇吉。蔡懋德。孫傳庭等。以闖獻蹂躪。禦賊亡身。懷懷猶有生氣。總由明政不綱。自萬歷以至崇禎。權奸接踵。閹豎橫行。遂至黑白混淆。忠良泯滅。每爲之切齒不平。福王時。雖間有追諡之人。而去取未公。亦無足爲重。朕惟以大公至正爲衡。凡明季盡節諸臣。既能爲國抒忠。優獎實同一視。至錢謙益之自翮清流。覲顏降附。及金堡。屈大均輩之倖生畏死。詭託緇流。均屬喪心無恥。若輩果能死節。則今日亦當在予旌之列。乃旣不能捨命。而猶假語言文字。以自圖掩飾。其偷生是必當明斥。其進退無據之非。以隱殛其冥漠不靈之魄。一褒一貶。褒貶昭然。使天下萬世。共知朕準情理而公好惡。以是植綱常。卽以是示彰瘅。所有應諡諸人。並查明史及輯覽所載。遵照世祖時之例。仍其原官。予以諡號。其如何分別定諡之處。著大學士。九卿。京堂。翰詹科道。集議以聞。並通諭中外知之。欽此。

欽定勝朝殉節諸臣錄

督師太傅兼太子太師建極殿大學士兵部尙書史可法。錦衣衛籍。祥符人。崇正中爲安池道安慶巡撫。愛民敬士。屢卻寇兵。進南京。兵部尙書。誓師勤王。迎立福王。出鎮江北。力圖興復。大兵旣克揚州。自刎不殊。被執死之。

按史可法節秉清剛。心存幹濟。危顛難救。正直不回。允宜專諡。謹擬諡忠正。

勅賜專諡文

奉天承運皇帝制曰。取義成仁。式著艱貞之烈。易名表行。爰昭獎卹之公。眷致命之可風。曩迹未湮於異代。期扶綱之攸賴。休稱允協於千秋。爾故明督師太傅武英殿大學士兵部尚書史可法。砥行能堅。秉誠克裕。遭時坎坷。恆仗節以無撓。殉義從容。竟捐生而不悔。朕覽披信史。軫念忠微。予褒顯於崇祠。用隆秩祀。示表章於往籍。載錫嘉名。象厥生平。諡爲忠正。於戲。溯流芳於頑廉。孺立節。或重於泰山。彰定論於世遠。風微榮。更逾於華袞。幽光特闡。鑒當年繳日之心。正氣咸伸。勵萬古疾風之節。欽茲茂典。慰爾英靈。

乾隆四十一年正月 日

御製題像詩

紀文會識一篇篇。予諡仍留兩字芳。

乙未冬。命大學士九卿等。核勝國殉節諸臣事實。定議予諡。可法得諡忠正。

凡此無非勵臣節。監茲可不慎。

君綱像斯觀矣。臚斯撫月與霽而風與光。並命復書畫卷內。千秋忠蹟表維揚。

侍郎彭元瑞。以所得史可法畫像。并其家書。裝卷呈進。乞書御製書事文。因成是什。題卷首。而向所製書事一篇。及可法復書。則命大學士于敏中書於卷內。卽以此卷郵發兩淮鹽政。置梅花嶺可法祠中。並聽摹鑄祠壁。以垂久遠。乾隆丁酉仲夏。御筆。

御製書明臣史可法復書睿親王事

幼年卽羨聞我攝政睿親王致明臣史可法書而未見其文。昨輯宗室王公功績表傳。乃得讀其文。所爲揭大義而示正理。引春秋之法。斥偏安之非。旨正辭嚴。心實嘉之。而所云可法遣人報書。語多不屈。固未嘗載其書語也。夫可法明臣也。其不屈正也。不載其語。不有失忠臣之心乎。且其語不載。則後世之人。將不知其何所謂。必有疑惡其語而去之者。是大不可也。因命儒臣物色之書。市及藏家。則亦不可得。復命索之於內閣冊庫。乃始得焉。卒讀一再。惜可法之孤忠。歎福王之不惠。有如此臣而不能信用。使權奸掣其肘。而卒致淪亡也。夫福王卽信用可法。其能守長江爲南宋之偏安與否。猶未可知。而況燕雀處堂。無深謀遠慮。使兵頓餉竭。忠臣流涕頓足。而嘆無能爲。惟有一死以報國。是不大可哀乎。且可法書語。初無詭辭不經之言。雖心折於睿王。而不得不強辭以辯。亦仍明臣尊明之義耳。余以爲不必諱。亦不可諱。故書其事如右。而可法之書。並命附錄於後。夫可法卽擬之文天祥。實無不可。而明史本傳。乃稱其母夢文天祥而生。則出於稗野之附會。失之不經矣。

乾隆四十二年六月二十日。奉旨命大學士于敏中書於像卷。勒石揚州祠壁。

賜題遺像諭旨

乾隆四十二年六月二十日。奉上諭。侍郎彭元瑞以所得明臣史可法畫像。及其札稿合卷進呈。朕親製詩一章。題於卷端。命廷臣和韻。並命大學士于敏中書御製書事一篇。及史可法復攝政王書於卷。茲另爲裝潢篋貯。著發交寅著令將此卷弄於揚州梅花嶺史可法祠中。並將卷內所有詩文畫像札稿。勒石祠壁。以垂永遠。至此卷如有願求展閱者。亦聽其便。但當加意護守。勿使稍致污損。將此傳諭寅著知之。欽此。

奉勅恭和御製題明臣史可法遺像元韻

臣于敏中

遺像留傳殊鶴化。忠魂來往與梅芳。

可法死臨年。家人以匏笏招魂。葬揚州郭外之梅花嶺。見明史本傳。

前身何必定信國。

史載。可法母夢文天祥而生。御製文

斥其附會。

內患那堪甚李綱。

可法內扼於馬阮。猶李綱之沮於汪黃。而士英大賊之奸邪。黜國

並不及宋高宗。可法遭之。尤爲不幸也。

附卷一書天地量易

名兩字日星光。

聖人有作敦人極。臣與榮焉載筆揚。

臣敏中奉勅敬書御製壽事。文於卷內。與有榮幸。

臣梁國治

披圖對影風還憶。奏御邀題蹟愈芳。天與忠魂旌七字。人留正氣在三鋼。梅花祠古衣冠冷。江水瀾澄日月光。有詔和詩兼刻壁。小臣何以奉廣揚。

臣沈初

一載小朝猶草勁。百年遺廟有椒芳。狼烽夕照城空守。燕子春燈政不綱。餘閭尙難儕是長。中興無望繼高光。易名題像因垂教。匪僅褒施毅魄揚。

臣彭元瑞

鬚眉正氣遺圖黯。涕淚家書淡墨芳。留豹文超六一記。遺像得倚天題。光昭萬古。歐陽修爲王彥章作畫像記。不足言矣。獲麟筆歷紫陽綱。御批通鑑輯覽。分紀福王。萬世特筆。直挾春秋。剛紫陽疑經乎。臣與修明紀綱目。常深悅服。殘縑入市偶然得。裏翰從天與有光。臣奕對次恭題。御題獲遺願。允遙識梅花。

嶺祠外江聲無復舊波揚。

臣董誥

存書錫謚會褒烈。灑翰吟題再闡芳。用教爲臣與爲子。特標之紀更之綱。已無骨共梅爭冷。但有心將日並光。天與孤忠千古在。漫傳仙去浪稱揚。

見卷中
跋語

臣劉墉

成仁取義當時懷。斷楮殘煤異代芳。獨力自甘支敗局。偏安誰共整頽綱。衣冠藏處風煙古。面貌傳來纓素光。勝國孤忠宜領袖。特膺天筆賜褒揚。

臣金士松

青磷骨化隨殘局。遺像猶留百世芳。亮節堪教臣作鑒。天題直與史爲綱。附書錫謚誠無忝。國信家言兩有光。遙想靈祠風颯爽。大荒披髮尙飛揚。

臣陳孝泳

展卷孤忠遺貌在。褒題天筆爲留芳。半生報國支殘局。一死成仁見大綱。人但衣冠書不滅。名因日月謚彌光。靈祠想像梅花外。江表清風萬古揚。

史忠正公集目錄

卷一

疏

請濬河濟運疏

祭二陵畢上疏

請定京營制疏

議設四藩疏

請頒勅印給軍需疏

請尊上權化水火疏

乞下撫臣黃家瑞等處分疏

報高兵移屯瓜洲疏

請頒詔勅定人心疏

請遣北使疏

請進取疏

論人才疏

請行徵辟保舉疏

論從逆南還疏

請出師討賊疏

請旌淮人忠義疏

論從逆法宜從重疏

請勵戰守疏

請緊急防守疏

辭加銜疏

請飭禁門戶疏

自劾師久無功疏

請早定廟算疏

卷二

書

✓ 復攝政睿親王書

答左公子

致劉允平同年

致金楚曉

與李餘我

復傅鶴汀

致副總馬元度

與金正希

復孫魯山

與雲間諸紳

卷三

家書

致某

✓ 復左公子

致孫魯山胡吉雲夏國山

與湯公祖

復劉允平同年

與楊某

復徽州紳士

復左武康

致給諫倪某

家書一

家書二

家書三

家書四

家書五

家書六

家書七

家書八

家書九

家書十

家書十一

家書十二

家書十三

家書十四

遺書

遺書一

遺書二

遺書三

遺書四

遺書五

二十一日遺筆

卷四

雜文

甲申討李賊布告天下檄

祭左忠毅公文

祭廬州殉難官紳士民文

邀助左公子啓

史忠正公集 目錄

乞閒詠序

詩

六安署病中感懷

燕子磯口占

四書文

子曰若聖與仁 一章

憶母

爲天下得人者謂之仁

史忠正公集卷一

奏疏

請濬河濟運疏

明大興史可



今歲漕船北上。於六月內已盡過洪。所遲至八月者。惟趕幫零船耳。方望全幫回空。早濟新運。不意北河淺阻。南下無多。臣方以此爲慮。乃突報開封河決。下流盡淤。向之洶湧而來者。今且褻褻而涉矣。嘗考河決入淮。從來爲害。卽以國朝言之。洪武二十四年。決於原武。由陳潁至壽州。正陽鎮全入於淮。元賈魯所挑之河。遂成淤塞。時猶未有河運也。及正統十三年。決於滎陽。過開封城。西南經陳留入亳州之渦口。又經蒙城懷遠東北入淮。全河南徙。以達於海。嘉靖九年。河決野雞岡。由渦河經亳州入淮。呂梁二洪告涸。萬歷十五年。決於單縣之黃涸口。溢於河南夏邑永城界。經宿州符離橋。出宿遷新河口。入大河。半由徐州入舊河。濟運二洪告涸。時司河者。每至冬月。卽其地開一小河。春夏則引水以下徐州濟運。至秋卽淤。漕舟至京。往往愆期。又三十年。河決蒙牆寺。入歸德商邱永城南徙。而河與淮全入洪澤湖。有妨陵寢。總之挾淮而東。未有不爲陵運之害者。今亳州蒙城懷遠等州縣。已被水衝。臨淮泗州水勢日長。與伏秋洶湧深廣相同。洪澤一湖。斷難容受。其勢必漫過高家堰之上。椿石久圯。立見衝崩。淮揚之間。盡爲沼矣。所

求椿石之需。不容時刻緩者也。況河并於淮。盡由清口吐出。滔滔東往。誰能挽之。自清河至宿遷二百五十里之河身。將歸淤澱。而回空南下。與新運北上。盡爲阻絕矣。先年京倉儲積。足資數年。運道暫淤。猶堪補救。今則歲漕四百萬。僅支目前。一有愆期。所關豈小。伏乞敕下該部。速行確議。或捐金錢濟潰。及早興工。或擇望重之臣。專爲經理。務於正二月內。塞決完工。庶免震驚漕無昏墊之災矣。

祭二陵畢上疏

陛下踐阼初。祇謁孝陵。哭泣盡哀。道路感動。若躬謁二陵。親見鳳泗蒿萊滿目。雞犬無聲。當益悲憤。願慎終如始。處深宮廣廈。則思東北諸陵魂魄之未安。享玉食大庖。則思東北諸陵麥飯之無展。膺圖受籙。則念先帝之集木馭朽。何以忽觀危亡。早朝晏罷。則念先帝之克勤克儉。何以卒墜大業。戰兢惕厲。無時怠荒。二祖列宗。將默佑中興。若晏處東南。不思遠略。賢奸無辨。威斷不靈。老成投簪。豪傑裹足。祖宗怨恫。天命潛移。東南一隅。未可保也。

請定京營制疏

江北四藩既設。長江水卒復增。門戶之防。此爲最要。次之則都城矣。南京舊有內外守備。及參贊各衙。蓋爲至尊在北。諸臣留守南都。特假隆稱。以示重要。恭遇殿下。郊廓鍾祥。豐鎬奠鼎。萬幾守備。無不仰稟廟謨。臣等何所容其參贊。則舊帶守備參贊各衙。皆當裁去。惟照北都之例。改設團營。卽以大教場小教場神機三營。做五軍神樞機三營之意。每營練兵一萬。以副參遊都四員分領。以一提督總領之。其本營兵

額不敷。聽於別營選湊。如再不足。則另募補充。此皆戰兵也。此外則立巡捕營。用兵六千名。以兩參遊分領。以一提督總領之。所以防內姦也。此外則併神威振武爲一營。用兵五千名。以兩副總參分領。以一勳臣總領之。所以護陵寢也。此外則照北兵部例。設中軍一員。兵三千名。爲部標營。以副將一員領之。所以示居重也。兵制定而統之。不可無重臣。應照京營例。設總督勳臣一員。協理樞臣一員。各兵除防江者另屬操臣。禁律另算。及護陵者。另屬勳臣外。其餘凡係京營之兵。悉歸統轄。庶人心一。號令明。以戰以守。截然不亂矣。此整飭京營之大概也。至於中前等五府。每府向止簽書一員。而提督居其三。應照北例。各府用簽書勳臣一員。提督五員。在外。其侍直大漢紅盔叉刀圍子手。以及錦衣鑾輿等司。應用軍拔。爲數甚多。此時律軍俱入伍。操防不便。多掣權。擬招選大漢將軍三百員。紅盔叉刀圍子手三千員。加以原有皇城直軍可足五千之數。其簡選精壯。加給月糧。務令實堪拱護之用。以勳戚一員領之。錦衣衛旗校酌設八百員。其領之者。用堂上官一員。加提督官旗辦事字樣。其東西兩司街道房。南北兩鎮撫司官不必備。所以杜告密。收人心。省繁費也。臣所議備都城者如此。

議設四藩疏

從來守江南者必於江北。卽弱如六朝。猶爭雄於徐泗潁壽之間。不宜畫江而守明矣。但此時賊鋒正銳。我兵氣靡。備分則力單。顧遠則遺近。不得不擇可守之地。立定根基。然後再圖進取。臣酌地利。當設四藩。其一淮徐。其一揚潞。其一鳳泗。其一廬六。以淮揚泗廬自守。而以徐潞鳳六爲進取基。各屬之兵馬錢糧。

聽其行取。如恢一城、奪一邑。卽屬其分界之內。廬城踞江稍遠。有警不妨移駐江浦。六合以捍蔽沿江。相機固守。江北之兵聲旣振。則江南之人情自安矣。

請頒敕印給軍需疏

江北軍民不安。洵洵告急。臣奉命督師。卽當啓行。今請速頒敕印。以便行事。又各項軍器。所需不貲。臣在南都造過紅夷滅賊等大礮。及鳥銃。三眼鎗。腰刀等件。不下數千。皆發各營。見在操練。今置造無及。需用難緩。不得不於內庫所備。暫借應用。伏乞於兵仗局發明銅甲葉。多則一千副。少則五六百副。於供應機房發駁回雜色緞一百匹。併內廠前買解京白布。發二三千匹。爲釘甲表裏。及棉甲等用。於兵仗局戍字等庫。發舊倭刀三五千把。爲馬上精兵之用。發皮團牌二千面。爲守城及船上選鋒遮洋之用。於各營取原發紅夷礮五十位。滅敵礮五十位。原領內庫銅鍋三百口。再將戶部員外丁煜買到紅銅。發一萬斤。爲打造鑼鍋之用。此應用軍需不容缺少。諸鎮兵集江北。臣到彼便須給發。錢糧除貯淮揚之銀。聽臣察取泊河湖之米。聽行收貯應用。此外尙須二三十萬金。攜帶前行。容臣於江上迎催解北之銀。題明留用。用完奏銷。此應用錢糧不容缺少者也。統祈聖俞。允行。

請尊上權化水火疏

先帝本堯舜之資。遘非常之禍。總由文官愛錢。武官怕死所致。今憂時憤慨者。謂文官愛錢不怕死。武官怕死又要錢。二語真切中膏肓。令在廷諸臣無處生活也。當茲聖政方新。卽臥薪嘗膽。猶恐締造維艱。不

意二十三日早朝有文武忿爭一事。聞之主辱則臣死。今主死而臣生。凡屬臣工。誰能無罪。文臣固多誤國。武臣豈盡矢忠。纍纍降賊者。甯獨文臣哉。年來仕途不清。病在黨同伐異。或以不肖之罪。百足不僵。或以可用之才。一眚永錮。各懷偏私。日尋水火。文與武不和。而文與文又不和。朋黨之禍熾。人才之用阻。不知可否。自有聖鑒。臣下豈可懸定。舊撫吳姓。因奉命討賊。遲延。先帝罷歸。復催促至京。擬戍金齒。冢臣慎言。復行舉用。諸臣既謂不可。公靡言之可也。公疏爭之可也。何事痛哭喧呼。聲徹殿陛。聞之駭將悍卒。不益輕朝廷。而長禍亂耶。臣辦寇不遑。分不應談內事。但朝端之水火不化。則封疆之功罪不明。乞嚴飭諸臣。悉捐成見。一秉虛公。過則懲其過。才則用其才。王道蕩平。不容偏倚。主權尊而國威始振矣。

乞下撫臣黃家瑞道臣馬鳴騷處分疏

題爲悍民慘殺無辜鄉紳等事。鎮臣高傑率兵南下。揚人實未預知。初至不無騷擾。及鎮臣既到。取犯兵斬之以徇。日不下十數人。地方官民可以諒矣。乃撫臣黃家瑞漫無主張。道臣馬鳴騷一味徇。聽城中百姓。日於河邊草隙取零星殺之。因是結釁愈深。竟不可解。鄉紳鄭元勳親到高營。所以爲百姓之心。無所不至。而百姓反謂通同播害。乘元勳一言之誤。當撫臣座次操戈而羣殺之。至碎其身首。撫臣之威令謂何。至於道臣始則乖張。後復畏縮。今且避往秦州矣。罵兵殺兵以爲愛民。而不知適所以害之也。臣於二臣不能無憾。乞敕下處分。以諭三軍。以諭百姓。一面察其首惡。立重創之。庶紀綱不至盡壞。謹題。

報高兵移屯瓜洲疏

鎮臣高傑兵奉旨駐揚。揚人堅不肯納。蓋從前既有警隙。則向後不無隄防。嚴令驅之不能也。臣前渡江。欲了此事。即討賊西行。不意兵民扞格不解。揚人惟利兵去。各兵惟願駐揚。好事者遂造爲不根之言。如鎮臣黃得功到儀真。安插家眷。或謂高曰。此乃與爾兵爲難者。於是高兵移野以待。及臣至。或又謂高曰。此來非真心特爲爾。至此兵疑臣。將疑臣。即傑亦疑臣。臣惟處之以坦。待之以誠。數日間。傑亦諒臣心事矣。臣昨與鎮臣議。無以家口之故。致兵民水火。誤練兵勦賊之事。將傑兵移駐瓜州。瓜卽江都縣轄。距揚四十里。有城有水。資給日用。較揚更便。惟時爲鎮臣劉澤清標下官兵未去。俟澤清赴淮。卽可移駐。并譏傑標下副將李成棟一旅。目前暫駐六合。黃得功汛地。隨當移駐盱泗。計隨至瓜者。不過十分之六七耳。安頓旣妥。卽選銳北行。傑在瓜。臣在揚。調停兵民猜嫌。可漸釋矣。

請頒詔敕定人心疏

臣在淮揚安頓兵馬。目擊人情之乖忤。心憂時事之艱危。忽聞北地報捷。絡繹而至。或云遼帥吳三桂殺賊數萬。闖賊西奔。或云唐通內應。闖已授首。據撫臣黃家瑞送臣一報。謂有武弁子劉崇軸。於四月二十七日。自京中來。親見吳帥入城。驅勦闖逆。已經發牌南來。而舊輔謝陞。於德州集兵數萬。聲勢大振。又青州諸紳遺臣一札。內云四月二十四日。吳鎮大敗賊兵於一片石。賊踉蹌入都。盡掠貨財。於四月二十八日西遁。訖青州紳士軍民。殺其僞將軍。僞道。僞府。其餘相繼殺僞官者十處。諸君子速立新天子。號召義勇。補天浴日之功。正在此時。臣讀未竟。不覺舉手加額。爲宗社生民慶也。此時黃河之北。便同異域。陛下

進膺大寶。正位舊都。山東北直尙未通曉。萬一人心渙散。固盡棄前功。卽或割據分爭。又漸生後患。伏乞陛下卽諭該部院選廷臣有才望者。齎監國卽位二詔。及賜吳三桂謝陞二敕。直抵山東北直一帶。曉諭通知。庶人心有歸。掃三秦之餘孽。在指顧間矣。

請遣北使疏

先帝以聖明之主。遭變非常。卽梟逆闖之頭。不足紓宗社臣民之恨。是目前最急者無逾於辦寇矣。然以我之全力用之寇。而從傍有牽我者。則我之力分。以寇之全力用之我。而從傍有助我者。則寇之勢弱。不待智者而後知也。近聞遼鎮吳三桂殺賊十餘萬。追至晉界而還。或云假之以破賊。或云借之以成功。音耗杳然。未審孰是。然以理籌度。甯前旣撤。則勢必隨以入關。此時畿輔間必不爲我所有。但旣能殺賊。卽爲我復讐。予以義名。因其順勢。先國讎之大。而特釋前嫌。借兵力之強。而盡殲醜類。亦今日不得不然之著數也。敵兵聞已南來。凶寇又將東突。未見廟堂議定。遣何官。用何敕。辦何銀幣。派何從人。議論徒多。光陰已過。萬一北兵至河上。然後遣行。是彼有助我之心。而我反拒。彼有圖我之志。而我反迎。旣示我弱。益見敵強。不益歎中國之無人。而自此北行之無望耶。乞敕兵部卽定應遣之官。某文某武。是何稱謂。速行覈議。應用銀幣。速行置辦。並隨行官役若干。應給糜費若干。一併料理完備。刻期起行。庶款出不爲無名。而滅寇端在此舉矣。

請進取疏

奏爲恢復固非浪試。偏安實難自足等事。臣觀古帝王之中興也。莫不拓基於自強。而畫境於自足。故漢之光武曰。旣得隴。復望蜀。人苦不知足。明知足不可狃。而反以不知足自嘲。故取於天下者足也。若宋高之紹統藩服。僅有天下半耳。而說者謂其病於意足。以己之僅有爲有。而不以祖宗之全有爲有。故足耳。若我皇上於今日。則何足之有。以河雒爲豐沛。則恭皇帝宅中之舊封也。爲恭皇之所已有而不有。則不足。以金陵爲長安。則高皇帝無外之初基也。爲高皇帝之所全有而不有。則亦不足。恢復之計。復何可緩。然而事難浪試。志多中止。昔子胥之揣句踐也。曰。爲人能辛苦。則無荒於禽。無荒於觴。無荒於色。無荒於瓊宮瑤臺之觀。南金和寶之玩。皆此物此志也。君勵膽薪。臣搆桑土。斯謂辛苦耳。而況今何時也。宮闕已燬。陵園漸蕪。登城北望。慨然流涕。興思至此。恨不能疾趨陝右。直抵燕中。登祖陵而拜九廟。對御寢而哭先皇。以仰副皇上之所以任臣。與臣所以自矢之初志也。無奈天心不順。人事未周。甲兵日頓。蓄積日乏。將士日懦。且驕。當此而言恢復。不但寸土難圖。將見故疆日失。掩耳之譏。其何免之。所可冀者。國運雖衰。人心未改。猶可勉力支持。惟願皇上乘此艱難啓運之時。亟圖報讐雪恥之舉。獎率諸臣。臥薪嘗膽。藉甲枕戈。務求縛奇兒以慰先帝。復故土以光祖宗。則中興之業。斯偉然昭著於萬世。斷不可以江南片席地。儼然自足。以下等於宋高也。昔吳夫差之卽位也。出入必令人呼曰。爾忘越王殺爾父乎。曰。不敢忘。其報越何決。迨後志倦垂成。以荒湛自娛。而句踐乃以辛苦乘其敝。此亦靡不有初。鮮克有終之前車矣。故臣願皇上時時抱痛。刻刻懷恥。以此志爲中外臣民倡也。不然者。皇上旣弛於上。諸臣必逸於下。將見麴蘖

沈湎事業。或墜於醉夢。美色幸御。精神半付於蛾眉。君忘中原矣。新亭之血淚漸乾。東山之絲竹日鬧。臣忘中原矣。望使徒痛於高麗拜。詔不呼於河湟。民忘中原矣。始於壯志於上馬。謂黃龍之直抵有期。終耗雄心於跨驢。謂西湖之行樂可老。將若士俱忘中原矣。誠如是也。將祖宗之幽恨何時舒。先帝之深讐何日復。進取不銳。則守禦必不堅。臣願皇上與諸臣發一猛省也。抑臣更有請焉。夫宋之南遷也。猶走李成。擒楊玄以靖內者。制外而今則獻搖交熾。兩川危如纍卵。且汀漳南贛間。又以警聞矣。北有旣毀之室。南無可怡之堂。徒曰王業不偏安。何偏可據。安尤大言之也。輿言及此。可爲寒心。而所差可幸者。兩虎相鬪。南牧未遑。綢繆未雨。惟此閒暇時乎。時乎不再來矣。若夫彼操鷓蚌之二矛。我睡漁人之一枕。失今不圖。後將有不及圖者。惟陛下加意振勵。申飭施行。臣不勝悚切涕泣待命之至。

論人才疏

邇者國家人才日耗。仕路日淆。皆因名心勝而實業不修。議論多而成功絕少。遇清卿臺省之缺。則曰經濟非其人不可。遇錢穀之任。則曰此吏事不足煩大賢。遇兵戎之寄。則曰此難題不足苦吾輩。此推彼卸。姑付庸人。倏用倏更。有同兒戲。卽偶出特簡。又必百計求全。一事不做。非託病則棄官去。舉諸臣精神力。量盡用之。做官曾無爲國家實實籌兵餉者。先帝皇皇求治。卒底於亂。蓋繇此耳。今時事益棘。覆轍在前。必以討賊復讐。刻刻入諸臣之魂夢。除卻籌兵籌餉。別無議論。除卻治兵治餉。別無人才。如撫拾浮誇。薦引市德。罪無赦。如巧躋華要。厭薄煩難。或借題轉官。虛應誤事。罪無赦。以後升遷考選。必須實實爲國家

籌兵籌餉。治兵治餉之人。則人才必奮。而事功必出。若空言討賊。空言復讐。諸臣能言。臣亦能言。卽草野書生。少明君臣大義。陋晉宋偏安者。亦人人能言。安在空言有濟。乞敕廷臣。將在朝在野人才。合併打算。某堪治兵。卽用以治兵。某堪治餉。卽用以治餉。其治兵者。或爲危疆督撫。或爲要地司道。其治餉者。或爲戶工堂屬。或爲各省藩司。但論人不論官。官大者亦可小就。而後懸破格之遷。官小者亦可大用。而後課非常之效。其餘一切不急之官。姑且緩用。不急之務。姑且緩行。則中興之業成矣。

請行徵辟保舉疏

國家設四藩於江北。非爲偏安計也。欲養成氣力。恢復神京。澄清關陝。以歸全盛耳。特慮兵戈擾攘。不復有百姓。無百姓何利有疆土。故擇吏不緩擇將。而救亂莫先救民。所謂得一賢守。如得勝兵萬人。得一賢令。如得勝兵三千。今日是也。前北都未陷。求牧方殷。非不有破格之陞除。何曾收得人之實效。地有難易。缺有炎涼。無不營避。而兵荒殘破之地。卒授之庸人。況今已陷之殘疆。另圖恢復。安民禦寇。萬苦萬難。豈白面書生所能勝任。目今人才告乏。資格爲拘。東南缺員不少。安能復填西北。使無致嘆於晨星。則銓選法窮。不得不改爲徵辟。往時保舉多係幕羶。故捷足蠅營。真才裹足。今西北則危地也。危則人人思避。必真從君父起念者。乃始投袂相從。臣意宜做保舉法。通行省直撫按司道。及在京九卿科道。果有才膽過人。堪拯危亂者。不拘資格。各舉一人送京。資以路費。赴軍前效用。酌補守令缺員。二年考滿。平升善地。三年考選。優擢京曹。有靖亂恢疆功能殊異者。立以節鉞京堂用。示酬勸。如各官避嫌不舉。該科指參。其有

懷才自赴軍前者。驗其真才。一體錄用。有保護一方爲民推服者。卽桑梓亦可權宜徑用。乞敕部議行。

論從逆南還疏

先帝慘殉社稷。凡屬臣子皆有罪。在北始應從死。豈在南獨非人臣耶。卽臣可法。謬典南樞。臣士英。叨任鳳督。未聞悉東南甲。疾趨北援。鎮臣高傑。劉澤清。以兵力不支。折而南走。是首應重論者。臣等罪也。乃以聖明繼統。不惟斧鑕未加。抑且恩榮疊被。獨於在北諸臣。毛舉而概繩之。豈散秩閒曹。責反重於南樞鳳督哉。宜將從逆諸臣。擇罪狀顯著者。重處示儆。若僞命未污。身被刑拷者。可置勿問。營屯管河諸臣。雖非任封疆握兵權者可比。亦當察其所處時勢。定罪案輕重。其餘隱避北方。徘徊而後至者。准戴罪討賊。赴臣軍前酌用。至於東兵助戰。義重復讐。諸臣委曲相從。尤當原其心事。總之應罪者罪。無爲報怨之借題。應寬者寬。無令人心之解體。使天下曉然知君臣大義。不但在北者宜死。卽在南者亦宜死。而聖明宥過。不但在南者姑寬。卽在北者亦姑寬。必有全身忍詬之人。爲雪恥除兇之計。寬以死而報以死。或亦情理之所必至也。

請出師討賊疏

奏爲時事萬分難支。中興一無勝著。密請恢復遠略。激勵同讐。以收人心。以安天位事。痛自三月以來。陵寢荒蕪。山河鼎沸。大讐在目。一矢未加。臣備員督師。死不塞責。昔晉之東也。其君臣日圍中原。而僅保江左。宋之南也。其君臣盡力楚蜀。而僅固臨安。蓋偏安者恢復之退步。未有志在偏安。而遽能自立者也。大

變之初。黔黎灑泣。紳士悲哀。痛憤相乘。猶有朝氣。今兵驕餉詘。文恬武嬉。頓成暮氣矣。屢得北來塘報。皆言敵必南圖。水則廣調麗師。陸則分布精銳。盡河以北。悉爲敵有。而我河上之防。百未料理。人心不一。威令不行。復讐之師。不聞及關陝。討賊之約。不聞達北廷。一似君父之讐。置諸膜外。近見北示和議。固斷難成。一旦南侵。即使寇勢尙張。足以相拒。兩者必轉而相合。先向東南。宗社安危。決於此日。我卽卑宮菲食。嘗膽臥薪。聚才智之精神。枕戈待旦。合方州之物力。破釜沈舟。尙恐無救於事。以臣觀廟堂之舉動。百執事之經營。殊有未盡然者。夫將所以能克敵者氣也。君所以能馭將者志也。廟堂之志不奮。則行間之氣不鼓。夏少康不忘逃出。自竇之事。漢光武不忘蕪蕪。燕燕薪之時。臣願皇上爲少康光武。不願左右贊御。輕以唐肅宋高之說進也。憶北變初傳。人心駭震。臣等恭迎聖駕。臨莅南都。億萬之人。歡聲動地。皇上初見臣等。言及先帝。則淚下沾襟。次謁孝陵。贊及高皇帝。則淚痕滿袖。皇天后土。實式鑒臨。曾幾何時。可忘前事。先帝以聖明罹慘禍。此千古以來所未有之變也。先皇帝崩於賊。恭皇帝亦崩於賊。此千古以來所未有之讐也。先帝待臣以禮。御將以恩。一旦變出非常。在北諸臣死節者無多。在南諸臣討賊者復少。此千古以來所未有之恥也。庶民之家。父兄被殺。尙思穴胸斷脰。得而甘心。況在朝廷。願可漠置。以臣仰觀聖德。俯察人心。似有初而鮮終。改德而見怨。以敵之強若彼。而我之弱如此。以敵之收拾人心若彼。而我之漸失人心如此。臣恐恢復之無期。而偏安未可保也。合宜速發討賊之詔。嚴責臣與四鎮使。悉簡精銳。直指秦關。懸上爵以待有功。假便宜而責成效。絲綸之布。痛切淋漓。庶使海內忠臣義士。聞而感泣。國家

遭此大變。皇上嗣承大統。原與前代不同。諸臣但有罪之當誅。實無功之足錄。臣於登極詔稿將加恩一款。特爲刪除。不意頒發之時。仍復開載。聞敵人見此亦笑之。今恩外加恩。紛紛未已。武臣腰玉。直等尋常。名器濫觴。於斯爲極。以後似宜慎重。專待真正戰功。庶使行閒之猛將勁卒。有所激勵也。至兵行討賊。最苦無糧。搜括萬不可行。勸輸亦覺難強。似宜將內庫一應本折。盡行催解。湊濟軍需。其餘不急之工程。可已之繁費。一切報罷。朝夕之宴衍。左右之貢獻。一切謝絕。卽事關典禮。萬不容廢者。亦宜概從儉約。蓋賊一日不滅。敵一日不退。卽有深宮曲室。豈能晏處。卽有錦衣玉食。豈能安享。此時一舉一動。皆衆情向背所關。敵人窺伺所在也。必吾皇念念刻刻。在二帝列祖之鴻業。先帝之深讐。振舉朝之精神。萃四方之物力。以併於選將練兵滅寇禦敵之一事。庶乎人心猶可鼓。天意猶可回耳。臣待罪行間。不宜復預聞內政。然安內乃攘外之本。故敢痛切密陳。惟陛下留神省察。

請旌淮人忠義疏

聞賊自入關以後。聲勢逼人。假借安民。煽動海內。僞官一到。爭思奉迎。甚至督撫手握兵權。不能碎一僞牌。斬一僞使。人心之壞。至此極矣。惟有淮安官民固守。僞牌到碎之。僞使到斬之。賊逼河上。則邀擊而敗退之。賊將如董學禮白邦政等。皆躑躅而不敢前。民間義兵。集至一二十萬。聲勢之壯如長城。頃又報恢復宿遷。僞官遁走。江南少安。其有功於國家甚大。然淮人敢爲此者。實地方官鼓舞之力也。撫按諸臣。親在河干。與民共守。碎牌斬使。斷而行之。密遣各兵多所斬獲。故能振將卒同讐之氣。堅民間死守之心。東

南奠安。實賴此舉。伏乞敕下該部院。將按臣王燮。優擢示勸。撫臣路振飛。已經解任。另候優議。其地方鄉紳士民。及行間有功將士。併行按臣察確具題。特恩旌敘。庶忠義感奮。而他處投賊避賊。偷生苟免者。皆知所愧恥矣。

論從逆法宜從重疏

竊聞綱紀立則朝廷尊。法紀張則亂臣懼。頃者從逆一案。陛下遠而祖宗之恫。近而君父之讐。亙古希聞。於今爲烈。昔漢文帝以盜高廟之環。欲竟族之。曰。吾無以共承宗廟。唐高宗以伐昭陵之柏。欲卽殺之。曰。我不殺則爲不孝。視今日九廟諸陵。蕩然蹂躪。其痛憤何如。而大讐未獲。先誅事讐之人。執法將申。竟多舞法之吏。臣敢略陳膚見。冀聖明採擇焉。一議緩決。夫元年停刑。此承平之繼體。則然。若上位失而復尊。宗社危而再享。則當速誅大逆。上平天地之怒。下快臣民之心。如唐肅宗斬達奚珣等在乾元元年。宋高宗賜張邦昌死。併誅王時雍等。在建炎元年。卽靖康之末年。如宋法。則諸臣之死已緩。如唐法。則諸臣之死無辭。若僞防禦武懷僭命乘傳。渡河問鼎。尙敢在中興嗣統之後。不棄於淮師就縛之時。尤所得而旦夕甘心者也。一議贖辟。夫他罪可贖。從逆何罪而亦可贖。藉曰借給軍需。姑寬寸磔。抑思諸臣已無寸壤尺產。不應沒入司農。又何有敗履殘簪。堪復寬收獄吏。且諸臣之金穴積於何代。擢於何人。旣藉先帝以肥家。又資溫飽而賞罪。異日卽有閃爍窺伺。皆以納贖爲萬變不窮之長策矣。昔唐室播遷。乘輿無恙。尙決十八人。賜自盡七人。茲計六等中。止決四人。絞八人。又贖及絞。則殺者四人耳。鞏煇方允昌未獲。則殺

者二人耳。先帝蒙難一門，而諸臣逃死什九，亦何以謝闔宮之怨乎？一議錄用，夫臣節旣虧，他無足錄。數月而兩易其冠裳，一身而三呈其頤頰，前途如此，後效可知。乃皇上於從賊之韓四維，念其棄家來歸，臣謂棄家來歸，如東晉過江避亂，收卞壺庾亮等百人，今倣其事，以待夫秦晉燕齊家食諸臣，有受國恩而思漢，去墳墓以間關者，從賊諸臣，應不在此例。若從賊之棄家可用，則在籍之棄家者，今布滿江東，當盡還其職，而且作楚囚相對者矣。四維獨何幸而得此乎？他如張縉彥衛允文之督師防河，時敏之開屯，施鳳儀黃國琦之贊畫，旣任封疆，各有應得之條，分附諸等之末，亦法之正也。一議存疑，夫大逆固難妄加，但聞拜首賊廷，羅致殆遍，錦衣策馬，充斥長安，君亡不與俱亡，稱枉則亦何枉？若以摭拾風聞，誰屬讐人之口，至欲硬求對證，惟呼先帝之靈，乃存疑各臣，反多於諸等，無非持疑之一字，則謂之失出，而原在推蔽，則謂之掛議，而若難鍛鍊，此特刑官嚮法之功，諸臣營脫之繇耳。卽如庶常盡逆，已奉明旨，不在疑列，而魏學濂一人，尙云行察定奪，則猶之疑也。臣謂宜先定罪而行察，不可疑死而懸科也。以上數條，謹就前案參論，而臣更有議焉。一曰收漏逆，昔李綱以圍城中不執節者，皆欲論罪，比聞賊所之摩肩紛紛拜命，如吳偉業非先帝特簡者哉。賊至而汚，敵來再屈，與曹口皆以原官而銜僞命，頃又自北逃歸矣。臣恐二臣而外，實繁有徒，乃萬口共傳，六等不及，非勢家庇之，親朋諱之，卽多金脫之，門生故舊，百足以營之。應令諸臣各據確知，補牘入告。若武臣元勳，戚畹屠戮殆盡，而營衛等職，竟無一人與文臣同議，恐無以服受罪者之心。一曰嚴逮治，昔唐復東京，獲僞官三百，齊下京兆獄，付李栖筠等治之，而今者獄無多。

犯案有虛名。京邸潛來。黃昏幕下。里門驕從。白晝驕人。如陳名夏之竄迹他鄉。方拱乾之逍遙故土。縱而不緝爲失法。緝而不至爲抗命。徒使詣闕來投。則國人欲殺山頭相望。則司寇無刑。加以奉行者或求脫而委繫於家屬。或姑縱而觀望於歲時。賄賂公行。催提不及。恐無以服受繫者之心也。伏乞陛下嚴諭諸臣。搜剔遺污。肅清弊案。知木吏之無情面。使錢神不敢爲奸。三尺定於萬年。兩觀傳於一日。庶叛逆誅而神人快。國憲立而忠義彰矣。恭候敕下法司立賜施行。

請勵戰守疏

奏爲和議未成。戰氣宜勵。事屬者天方降割。遘此閔凶。眞主挺生。中興啓運。經綸裕於草昧。多難易以興邦。海宇欣欣。想觀盛治。乃歷時十月。徒煩宵旰殷憂。未有恢復勝著。北使言旋。敵兵踵至。和議已斷。斷無成矣。向以全力圖寇而不足者。今復分以禦敵矣。際此時艱。憂心欲絕。然歷觀往代衰亡。莫不因和自誤。今敵之拒我。正我所以自奮。與天所以成我之時。特在人心一轉耳。從來中興大業。不外於君臣一德。內外一心。當此危急存亡之時。可無同舟共濟之誼。臣嘗慨唐宋門戶之禍。竟與國運相終。即使所用皆賢。已廢卻一半。況以意氣相激。化成恩讐。恩怨一生。釀成殺運。近今之事。殊堪痛心。今時極艱危。爲臣不易官之久者。其負罪益深。位之尊者。其得禍更慘。有心之士。方以此爲危身積戾之場。而無識之人。乃以此爲快意尋讐之計。即使藏怒宿怨。孰有深於戕我君父。覆我邦家者。不此之讐。而猶修睚眦之微嫌。快升沈於轉轂。此之謂不知類矣。謂宜虛心平氣。還之大同。何人實是幹濟之才。何人實是清修之品。無尋題

目而開媒孽之端。無捕風影而肆株連之網。務得海內真正才品。舉而置之鈞衡。朝中之舉措咸宜。闔外之嫌疑自化。此臣所望於廟堂之同心者也。昔唐室嗣興時。則有若李郭。宋家再造時。則有若劉岳張韓。極其勳名。悉垂天壤。今之藩鎮。何多讓焉。若當患已剝膚。尙以賊貽君父。諒非諸鎮所忍出也。然大將所定者惟志。三軍所鼓者惟氣。志不齊一。氣不奮揚。雖賁育之雄。如林之衆。莫能用也。試思先帝之待諸鎮。何等厚恩。皇上之封諸鎮。何等隆遇。先帝之罹賊難。何等慘苦。諸鎮之不能救先帝於難。何等罪過。釋此不問。自弄干戈。是猶舍父母之讐。尋鄉鄰之鬪。於理安乎。於心忍乎。今和議不成。惟有言戰。戰非諸鎮之事。而誰事也。必皆以皇上復讐雪恥爲心。簡乃車徒。敕乃甲冑。朝營夕算。惟北是圖。其未至也。何以防。其既來也。何以禦。某所當者危地。而我必急以往援。某所爭者小嫌。而我必先以大義。田單報燕之日。將軍有死之心。士卒無生之氣。廉藺刎頸而定交。子儀釋憾而泣拜。諸鎮豈不聞乎。此臣所望於闔外之同心者也。然闔外所視者廟堂。廟堂所視者主志。我皇上中興未就。大警在身。凡一舉念一圖事。二祖列宗鑒之。恭皇帝烈皇帝鑒之。尤望深思痛憤。大渙絲綸。諭諸臣以怡堂必不可安。積習必不可狃。在內宜實籌兵餉。以臥薪嘗膽爲生機。在外宜力捍封疆。以江北中州爲死所。古人有言。不本人情。何由興復。今之人情。已大可見。撥亂爲治。轉弱爲強。在我皇上一振勵間耳。

請緊急防守疏

竊照靖南侯黃得功素行忠勇。其與已故興平伯高傑。原有昆弟之盟。傑既死。事疆場。決無乘危圖併之

理其引兵東下。蓋慮高營兵衆未免乘亂紛紜。故移師彈壓耳。不然四藩並建。義重情深。東平侯劉澤清。既爲傑請卹恩。請襲爵。廣昌伯劉良佐亦復不約而同。豈得功獨無同類之悲。同讐之誼乎。揚之兵民。風聞傳訛。閉門拒守。視若讐仇。將得功本心無以自明於天下。此嫌覺之所以難消也。臣到揚州。自當善爲調處。惟是目前急著。莫先於守河。高兵之所守者歸徐。萬一聞報南來。兵隨闖渡。歸徐失而三藩之地皆危矣。察良佐原有招討河南之任。合卽發兵一旅。赴防歸德之河。一面催給餉銀。以濟遠征之費。徐州雖有副將李成棟。而河信延長五百里。非一鎮之兵所能支。且各兵除徐州舊營外。餘兵家眷皆在瓜洲。聞此亦無固志。臣已再三嚴飭。不許一步擅離。淮撫管轄全疆。必須發兵協防。措糧接濟。此門戶之防。急當飛飭者也。邳宿孤懸河北。雖以臣標鎮將分發沿河。其實整營待戰之兵。不應爲分信零星之用。卽派防河上。前有定議。亦斷無渡河而北。代主兵守城之理。今准淮撫移會。欲撥臣標二千衆。代爲守邳。是明明置邳於度外矣。淮藩撫六萬之兵。一百二十萬之餉。可僅僅守一淮上乎。所當急發主兵。據城固守。而以臣標之兵爲應援。此重地之防。急當飛飭者也。臣雖奉命駐揚。終慮河防不固。數日之後。卽當北行。淮揚重地。須人彈壓。計爲鎮將兵民所懷服者。莫如監臣盧九德。高起潛。九德見督京營。恐無暇隙。合令起潛移鎮。早息兵爭。此根本之防。急當飛飭者也。除臣一面移文知會外。伏祈聖鑒。允行。

辭加銜疏

案照本年正月內。蒙諭旨。二宮告成。加臣太保。兼太子太師。賜衣襲子。臣具疏辭。奉旨。卿宜猷鞏固。誠心

擔荷勞苦倍於諸臣。加恩原酬夙謨。宜祇受所辭不允。欽此。又二月內。以土寇程繼孔伏誅。晉臣太傅。廕一子。臣又奏辭。奉旨程繼孔多年巨寇。爲患甚大。卿運籌發縱。尤爲功首。不必遜辭。欽此。臣疊被隆恩。益增悚惶。竊念大臣之廉恥。卽天下之風尚。一身之辭受。關四海之紀綱。虛冒恩賞。無以廉法諸臣。且使節節濫膺。必人人覬倖。其流弊也不小。先帝慘禍。亙古所無。不共戴天之謂何。尙忍昧良邀功。人理何在。臣每五夜搥心。仇讐之要領。何以尙存。北陵之梧楸。何以未埽。山東河北之赤子。何以慘罹水火。汝雒鄖襄之要害。何以尙阻馳驅。餉何以愈賸削。而庚癸頻呼。兵何以愈召募。而戰守日縮。薄海人才。何以關門不至。意外變故。何以逐日環生。愆且積於邱山。罪莫踰於擢髮。容敢受無功之賞。屢頌之賚乎。謹再瀝誠。悃乞收回成命。將來戮力危疆。勉樹尺寸。再承恩寵。亦未爲遲。此時則斷斷不敢受耳。

請飭禁門戶疏

題爲君讐未復。天運已周。伏乞先治臣罪。後責衆效。以正春秋之法。亟明討賊之義事。嗟乎。今乙酉三月十九日矣。臣聞去年三月十七日。賊逼都城。先皇帝仰天長號。遠殿環走。拊胸頓足。歎息通宵。大呼內外文武諸臣。誤我誤我。倉皇召對。人人戰栗無策。噤不發聲。乃政事之堂。尙在講門戶。講起用報復。講美缺危疆。大抵舉朝之精神才力。總不出此數端。遂至釀成地坼天崩之變。嗟乎。爲臣子者。尙忍言哉。臣待罪南樞。於義應死。其偷生以待者。亦謂徒死無益。不如捐謁頂踵。戮力行間。生致賊渠。獻之闕下。然後可以一死明報耳。今受命討賊。已十月矣。經營不爲不久。事權不爲不專。費餉不爲不多。用人不爲不

廣而心腹之憂特劇。指臂之運不靈。株守近畿。漫無遠略。闖賊東逼。一矢未加。五夜捫心。恨不卽死。因念春秋之法。凡賊不得。誓不復。則君不書葬。臣不除服。寢苦枕戈。無時而終。且於未能復誓之臣子。深加貶絕。一書再書。屢書而不諱。誠恐久之。則翫爲常事。安之則無復憤心耳。且載觀於書。宰糾一例。則責相尤嚴。於四年七年缺書二時。則責大司馬倍懷。臣謬以相而兼掌大司馬職者也。聖人於宰糾旣降書其名氏。今臣敢復列於冠裳。在天時尙經削其秋冬。在師帥敢仍存其爵位。所以然者。明大誓一日未討。則爲臣者。一刻難容於天地間。今日首先伏誅。以謝天下。非臣又誰責乎。伏願皇上重處微臣。以爲榜樣。一面布明大義。宏張天討。務期掃除氛熾。收復神京。使天下忠義之士。虓奮勇敢之氣。怒生。庶驕敵逆寇不至。笑中國爲苟安。而輕朝廷爲無人也。臣草疏未畢。哀痛不勝。遡流窮源。因致恨於諸臣。誤國之事。非一而門戶二字實爲禍首。從門戶生畛域。從畛域生恩怨。從恩怨生攻擊。而線索淵源之計愈巧。君子小人之辨愈淆。先儒謂纖私翳胸。萬物倒置矣。所以春秋之始。首嚴朋黨之誅。而門戶之名。竟結燕都之局。試問山陵安在。先皇帝后梓宮安在。血嗣安在。猶暇爭論。閑是閑非。擇取孰利孰害哉。覆轍在前。可爲炯鑒。伏願皇上申戒諸臣。毋得講門戶。講賄賂。講起用報復。講美缺危疆。合內外文武大小臣工。一心專講春秋復讐大義。斯爲真實忠君愛親。亦爲真實愛身家妻子也。若此後文臣猶愛錢。武臣猶惜死。睚眦必報。鬼域爲奸。將天道必爲降凶。而國法亦難曲貸矣。

自劾師久無功疏

臣本無才。謬膺討賊。亦謂猛拚一死。力殄逆氛。庶仰酬先帝之恩。光贊中興之治。豈知人情未協。時勢日艱。自舊歲五月出師。左拮右据。前蹙後跋。初則調停諸鎮。和同室之戈矛。繼則躑躅河上。憂三軍之庚癸。後且講信修睦。貽百出之譁張。夫皇上之所以任臣。與臣之所以自矢。豈僅僅支持河上。聊以固吾圉也哉。我之大讐在寇。不寇是討。而敵是防。已非微臣渡江之初願。況敵以討寇之舉。渡河而南。實與我偪處此土。而臣乃分防河之力。僕僕徐揚。內憂方深。外侮曷禦。是逆賊終無討滅之日也。大讐一日未復。則先皇之英爽。一日未甯。幽薊一日未恢。則諸陵之松楸。一日抱恫。臣是以仰天拊心。泣涕出血。精神日替。憂鬱日沈。疾病日加。深嘆於寸絲之莫酬。而萬死之莫贖也。臣幼讀易。曰德薄而位尊。智小而謀大。力小而任重。鮮不及矣。掩卷太息。聖人不但爲折足者戒。其得凶。實爲凝鼎者慮。其覆餗。如臣者。豈止自愧於薄小。竟德智力之俱無。儻乏自知之明。貿貿夜行。縱顛趾滅鼻。不自恤矣。如君父何。如社稷何。如蒼生何。今受命十月。而一旅未西。所幸苟且支延。警報少緩。後來之彥。猶可力迴覆轍。大振同仇。以補救於萬一。儻烽息再警。庸陋如初。倉猝呼援。雖有智者。莫措其手矣。伏乞皇上治臣無功之罪。妙簡有用之才。寄以重任。期以後效。俾讐恥立雪。仰報先皇。臣就鼎鑊如飴矣。

請早定廟算疏

從古守江者必先守淮。守淮者必先守河。此一定之形勢也。今北兵自西來。直抵歸德。我之河險已失矣。頃報北兵初二日。分爲兩路南指江干。所恃以堵禦者。一淮爲限耳。臣提兵赴泗。正思聯絡鳳泗。控守淮

南不意復有上游之警。調臣赴廬。皖上游。臣伏思上游之事。發難無名。沿江重兵。自足相抵。其勢未必卽東下。而北兵南來。則歷歷有據。聲勢震蕩。遠近惶駭。萬一長淮不守。直抵江上。沿江一帶。無一堅城。其誰爲禦之。不知士英何以蒙蔽至此。以臣愚議。應宿重兵於盱泗。臨淮、鳳陽、壽州。控淮爲守。以靖南一旅。合廣昌。以興平一旅。合臣之標兵。以東平一旅。合淮撫三方嚴備。形勢相依。或不致南下也。伏乞敕下樞臣。早定廟算。上游果急。勢固不得不先防。如尙在遲疑觀望之間。則廣昌靖南之師。未可輕爲調撤。進退之際。存亡係焉。不容不再四籌酌也。

史忠正公集卷二

書

復攝政睿親王書

南中向接好音。法隨遣使問訊。吳大將軍未敢遽通左右。非委隆誼於草莽也。誠以大夫無私交。春秋之義。今倥偬之際。忽捧琬琰之章。真不啻從天而降也。循讀再三。殷殷至意。若以逆賊尙稽天討。煩貴國憂法且感且愧。懼左右不察。謂南中臣民。媿安江左。竟忘君父之怨。敬爲貴國一詳陳之。我大行皇帝。敬天法祖。勤政愛民。真堯舜之主也。以庸臣誤國。致有三月十九日之事。法待罪南樞。救援無及。師次淮上。凶問遂來。地坼天崩。山枯海泣。嗟乎。人孰無君。雖肆法於市朝。以爲泄泄者之戒。亦奚足謝先皇帝於地下哉。爾時南中臣民。哀慟如喪考妣。無不拊膺切齒。欲悉東南之甲。立翦兇讐。而二三老臣。謂國破君亡。宗社爲重。相與迎立今上。以繫中外之心。今上非他。神宗之孫。光宗猶子。而大行皇帝之兄也。名正言順。天與人歸。五月朔日。駕臨南都。萬姓夾道歡呼。聲聞數里。羣臣勸進。今上悲不自勝。讓再讓三。僅允監國。迨臣民伏闕屢請。始以十五日正位南都。從前鳳集河清。瑞應非一。卽若告廟之日。紫雲如蓋。祝文升霄。萬目共瞻。欣傳盛事。大江湧出。栴栴數十萬章。助修宮殿。豈非天意也哉。越數日。遂命法視師江北。刻日西征。忽傳我大將吳三桂。借兵貴國。破走逆成。爲我先皇帝后發喪成禮。掃清宮闕。撫輯羣黎。且罷雍髮之

令示不忘本朝。此等舉動。振古鑠今。凡爲大明臣子。無不長跽北向。頂禮加額。豈但如明諭所云。感恩圖報已乎。謹於八月薄治筐篚。遣使犒師。兼欲請命鴻裁。連兵西討。是以王師旣發。復次江淮。乃辱明誨。引春秋大義。來相詰責。善哉乎推言之。然此文爲列國君薨。世子應立。有賊未討。不忍死其君者。立說耳。若夫天下共主。身殉社稷。青宮皇子。慘變非常。而猶拘牽不卽位之文。坐昧大一統之義。中原鼎沸。倉猝出師。將何以維繫人心。號召忠義。紫陽綱目。踵事春秋。其間特書。如莽移漢鼎。光武中興。不廢山陽。昭烈踐阼。懷愍亡國。晉元嗣基。徽欽蒙塵。宋高續統。是皆於國讐未翦之日。亟正位號。綱目未嘗斥爲自立。率以正統與之。甚至如元宗幸蜀。太子卽位靈武。議者疵之。亦未嘗不許以行權。幸其光復舊物也。本朝傳世十六。正統相承。自治冠帶之族。繼絕存亡。仁恩遐被。貴國昔在先朝。夙膺封號。載在盟府。甯不聞乎。今痛心本朝之難。驅除亂逆。可謂大義復著於春秋矣。昔契丹和宋。止歲輸以金糴。回紇助唐。原不利其土地。況貴國篤念世好。兵以義動。萬代瞻仰。在此一舉。若乃乘我蒙難。棄好崇讐。規此幅員。爲德不卒。是以義始而以利終。爲賊人所竊笑也。貴國豈其然。往先帝軫念潢池。不忍盡戮。勦撫互用。貽誤至今。今上天縱英明。刻刻以復讐爲念。廟堂之上。和衷體國。介冑之士。飲泣枕戈。忠義民兵。願爲國死。竊以爲天亡逆闖。不當不越於斯時矣。語曰。樹德務滋。除惡務盡。今逆成未服。天誅諒知捲土西秦。方圖報復。此不獨本朝不共戴天之恨。抑亦貴國除惡未盡之憂。伏乞堅同讐之誼。全始終之德。合師進討。問罪秦中。共梟逆賊之頭。以洩敷天之憤。則貴國義問照耀千秋。本朝圖報。惟力是視。從此兩國世通盟好。傳之無窮。不亦休乎。

至於牛耳之盟。則本朝使臣。久矣在道。不日抵燕。奉盤盂從事矣。法北望陵廟。無涕可揮。身蹈大戮。罪應萬死。所以不卽從先帝者。實惟社稷之故。傳曰。竭股肱之力。繼之以忠貞。法處今日。鞠躬致命。克盡臣節。所以報也。惟殿下實昭鑒之。

致某

弟雖庸陋無聞。竊願附正人君子之列。老鄉翁大名。不啻泰山北斗。惜兩地相懸。無緣親炙。左老恩師。立朝正色。憐士清心。行者誦之。途賈者談之。市況我輩。樞衣絳幃。親承知遇者乎。頃左世兄對揚北闕。具言腰成楚女。將吹乞食之簞。數米充飢。竟無王孫之飯。向之舉債以完官。今則刻期而取貸。在師母及諸世兄。人心熱面。豈肯坐負恩錢。然千金成擔。啓口爲羞。我輩必待其如何乞憐。然後假道義之名。而聊復周之。勺水星火。成仁取義。不幾以負吾師者。負節義耶。老鄉翁慷慨大節。斷不視爲行路。弟已具名京庠。傳單遍啓在貴庠者。惟老鄉翁竭力周全。人不定多寡。儀不嫌厚薄。至如近鄰郡學。鄉翁肯爲生生不窮之義。人心義理。士林公道。戴鄉翁者不淺。而天地鬼神。或亦式臨之矣。肅此仰千萬惟炤鑒。

答左公子

可法終年拮据。無日不以賊爲事。而每因棘手之故。曠廢居諸。今番之苦。乃較去歲爲甚。初於鄴家店札老營。設伏於關門冲界上塘撥與賊哨遇。幸得全歸。而賊亦揣知有伏。隨復引去。竊意僥倖無事矣。不料二十六夜。因黃梅城頭礮擊。遂分兩枝。一枝尙留黃梅。一枝遂入宿境。一望平原。無可扼防。而將兵可與

言守不可與言戰。又有如老世兄洞鑿者。刻下憂心如灼。無計可施。擬鼓奮一戰。而新練之卒。僅二千名。吳淞之四百皆象人也。撫臺操臺無一兵發到。時勢如此。付之浩歎。承教皆骨肉至愛。敢不佩服。第誰實備兵。而令吾民膏於鋒刃。捫躬自責。萬死莫辭。惟束身以聽處分而已。賊勢甚衆。實實不下數萬人。若由石碑走大路。勢必取道於桐。法已調池陽兵五十名。及甯安之二百往戍矣。按臺又現在嚴催。想不日到。諸凡守具。恃老世兄及諸老先生料理有素耳。慮慮漫復不盡。

復左公子

世兄自金陵回。便當鼓勵諸生。速爲善後之計。據賊營走回官兵。皆稱桐之寨黨從賊者甚多。時以桐之金帛子女誘令攻城。將來定有一番大舉。不可不想到也。晦日自石碑進兵。幸得小捷。終不能創之使去。奈何奈何。光固聲息又急。桐之爲桐。岌岌乎不可支也。今已發兵三百增戍。俟太湖之賊有退意。卽還顧矣。率復不一。

致劉允平同年

昨以小函奉候。想達尊覽矣。中秋別後。抵六安。遽有兵譁之事。蓋因各將家丁零星不成伍。下令歸併。遂有從中挑之者。其爲首有副將劉邦城之家丁。舉事之夜。其勢甚兇。而究竟爲首者不過數人。其餘皆昏夜迫脇。實不知情。次日追及。同黨者隨去。被脇者皆回。計走去不過四五十人。而南監之疏。情形迥異。不知風傳之訛。何遂至此。舒城之戰。淮兵札營不動。其追殺四十里。皆皖兵也。一戰之後。賊不敢留。亦庶幾

資其一臂矣。昨者朱公祖塘報謂犯瓦埠二百人。係是叛兵。實無此事。特老年臺至愛。乃敢布聞。亦以見任事之難也。萬祈祕密。弟因河南有復返之報。暫住六安。今已遠去的。於廿一北行矣。臨歧悵戀。如何可言。

致孫魯山胡吉雲夏國山

弟某自去臘廿四日督兵北行。今前鋒將抵竟。而弟尙在滕縣。其遲遲之故。因各撫俱奉旨止回。而寇復耽耽門庭。不得不從容候旨。以便回顧也。東省經難後。亂兵土賊到處橫行。不成世界。敵標之兵。幸守紀律。到處有壺漿相迎光景。只恨來遲。不能建寸功。以報聖恩耳。聞張鍾老闖門死難。令人涕零。盧九老身先將士。竟死於陣。國家失此棟梁。悲憤累日。不能自己。近日仕版中。不見姚永老。不知何故。邸報兩月不見。都門事一切茫然。今以奏銷勦餉之便。敬訊台祉。附有戀者。軍前監紀初薦歸德顏二守。未果。今擬用雄縣令張秉禮。聞此人乃總兵張安之子。做官有清名。而家計饒裕。常養壯馬健丁。且於去歲春間。竭力濟軍。有勦賊之志。若得此人可助一臂。因近畿州縣方慎遴選。恐又爲部覆所格。祈德惠玉成之。奏銷疏發於十二月八日。因承差被擄逃回。今再遣去。故仍前月日也。晉生親翁孫北海父母。均乞叱名致意。

致金楚畹

治某因寇遁河南。於去臘廿四日督兵北援。業已小函報聞矣。茲抵睢陽。聞山左之陷已及鄒滕。勢不得不渡河而北也。從此日遠旌旄。不勝悵慕。

與湯公祖

治生行次壽春。連接邸報。有敵兵出口之說。擬馳至蒙城。具疏回蓼。而以千金之餉。解濟京需。何等穩著。乃濡遲不決。直抵彭城。川兵倡言不肯渡河。沙中偶語。譁迹已彰。而該將不察也。於初九夜二鼓。忽發火數把。得李忠和輩鎮住。各兵旋札營不動。火勢延灼。遂燼河干草棚四百間。今已得首惡三人正法。治生進退狼狽。苦不可言。昨得老公祖札諭。卽擬旋師。因有此舉。反覺不便。只得渡河而北矣。乞老公祖措解餉銀三千。貯彭城以俟。若鄒滕間。可以得旨。庶還軍有名耳。萬惟留神。又聞豫兵大譁。許州降丁內叛。已不保矣。豈氣數到此。人力不可挽耶。可爲浩歎。

與李餘我

川兵妄逞。以嚴法懲之。幸已貼然渡河矣。忽接邸報。內見朱公祖入衛之疏。奉有已有旨。委道入衛之旨。而洪亨九老師與左總鎮。皆屢旨催之入衛。則治某此行。非敵出口。恐無還軍之理也。敬有瀆者。徐河廳同知張俊英。敵鄉人也。舊爲西安僚友。相與莫逆。其才品膽氣。卓爾不羣。向爲惡璫所糾。今以備河著績。考滿在邇。尚望栽培。又州同劉兆東。爲治某社友。一塵無染。百瘁不辭。雖么麼下吏。而志期甚遠。統乞祖臺於復命時。賜之薦剡。實足爲良吏勸。非敢阿私。幸俯原冒昧之罪。

復劉允平同年

南舒小捷。差壯軍聲。然猶未能滿志。捷後正遇邸報久斷。又老親困住天津城中。日夕憂惶。眠食俱廢。於

寇退之後。整旅北行。途次得家信。老親仰藉宏庇。已於仲冬念五抵舍矣。惟敵騎不返。今又漸逼鄒滕。皖兵苦單。恐不能渡河而北也。愁緒如蠟。莫知所裁。雖陽道中。捧讀台翰。所諭敘捷宜優。以鼓敵愾。弟固知之。第自反叨恩逾格。糜餉且多。小捷飾誇。實所未敢。若今番三戰皆捷。而寇則一去不留。將士之功。自是難掩。業爲備悉入告矣。地方蝗旱之後。又值寇氛。冬盡春初。困乏實甚。弟已設處賑給。行於六安霍山。而皖屬尙未能及。爲郡邑長吏。當此之際。莫爲省憂。可畏。容弟急商救濟之方。仰副德意。佈復不備。

復傅鶴汀

老父母居鄉居官。無間可議。樞曹一席。滿擬首推。不意僅得比部。方令人悵歎不已。乃未幾里衛議。以如此遷轉。而誣爲賄得。真可異也。承示大揭。剖辨極明。卒無奈當事瞻顧。莫爲平反。惟付之舉世公論而已。治生辦寇入援。日在勞攘。未遑遣候。疏節爲慚。聊代薄程。以將遠念。俟台駕卜居金陵。再圖晤語。不盡瞻馳。

與楊某

老年臺手翰所諭云云。真可怪事。然翻刻逆案。亦覺可省。弟前見左三哥。亦曾婉言規之。令其晦迹讀書。諸兄頗以爲是。不意果以此致警家之怒。至於不可解也。弟聞楚中各弁。深服老年臺寬大得體。覺弟事苛細。徒自苦耳。但此時收攬豪傑。體貌不妨稍優。而寬大中。自有應嚴覈處。弟偶有所聞。不敢不效他山之石也。特在骨肉。乃敢爾爾。惟我年臺諒之。

致副總馬元度

不佞閱人頗多。求將甚切。而忠義性生。膽智俱足。如大將軍者無一焉。平日企慕之殷。有如飢渴。無奈徐障江淮。較皖尤重。又虞當事夙倚。以此開嫌。幾欲別有借重。而躊躇未果。聞揆樞夾袋久已首推。不佞惟順風一呼。以快帥壇之早建而已。衝邊戰將。出於麾下者甚多。此時有置之散閑。未展大用者。不問官職崇卑。乞大將軍撥冗指示。求以共濟時艱。所甚快也。今日竟報何如。附求賜教。

復徽州紳士

今天下之所最厭苦者。惟賊與兵。乃兵之足爲患者。或自以爲兵。而郡邑莫能禦之。又或人以爲兵。而羣坐而俟之。是故兵之所恃以逞者。賊亦冒之以爲名。而居者不察。此郡邑之所以淪亡。而不可救也。貴鄉號僻壤。又殷富不見兵革。此其爲豺虎屬目久矣。三月祁門之役。衆志成城。一以扼險。殺敵爲勸。使天下之人。盡如貴邑。寇盜不難平也。而議論啾啾若此。何以爲地方綢繆計耶。所諭敬心識之。方宄率復。伏望鑒原。

與金正希

老年臺之名在天下。無知與不知皆能言之。若淮陰之距新安數百里。又受事有年。而高山之懷發於癡寐。上林之鴈不通數行。平生疏拙之辜。誠不可以擢髮論。以祁門三月之役。貴鄉諸生曾一通其顛末於淮上。而後知老年臺之忠孝。爲不可及也。當今之爲國家患者。賊而殺賊則兵也。兵能殺賊則兵不能

殺賊而所殺非賊。則併不得爲兵。夫兵之不得爲兵久矣。至兵之假號爲援勦。爲勤王。而實快其鹵掠。殺百姓之志。此憂時之士。所以當食而放箸也。又況紆途縱掠。明明賊之行徑。而欲責地方之不疑。何可得耶。前已有字致當事。乃其復弟者。以各兵自明其非賊。將馬匹器械。一切交付。而地方於深夜圍而火之。弟亦正疑此舉之太過。及讀台翰。則此語又似爲募兵官之故爲糲點也。台諭云。與賊入而後有悔。毋甯禦之而後有悔。夫禦之一字。既難言之。而悔之一字。尤難言之。今江北之民之蒙難者。歷十餘歲矣。苟其一心禦之。卽未必悔。苟不禦而卽悔。則亦必不禦。而以悔之置後。而禦之獨先。此固明哲之事。而何當事者之不見察也。老年臺身居苦塊之中。而力負疆場。志安桑梓。身任而不勞。怨至而不悔。慷慨激烈之氣。發於楮墨。纒纒累千百言。使人悚服。聖明在上。晦靈之日月。何可不揭中天而行也。大教謹一一心識之。弟法適以南樞員缺。謬膺簡命。今且揚帆次真州矣。正值旁午。諸不遑及。惟老年臺鑒之。嗣將另布。不盡欲言。

復左武康

痛哭先帝。瀝盡心血。卒瘞數月。甫戢兵民。而北騎紛紛南下。河干露宿。殮寢俱忘。苦不堪爲。知己述也。時事敗壞。一至於此。接手教。知爲政靖安。家國不負。獨老師叔之誣。大爲於邑。然此案借題泄忿。貪令止議。罰贖。卽加以庇貪之名。其爲滅等可知。一避不免借人口實矣。蓋庇之一字。代人受罰。而避則涉藐旨。世兄在事。無可媒孽。人卽善譖。何以加諸。愚意師叔不妨出質。痛言借題傾陷之故。卽至重擬。而灑滯別白。

自難泯。一世公心。千秋定論。世兄但期潔己靖共。靜俟公道之自定。避與遷皆非穩著也。至不佞軍前題用。尤爲不便。苟可用力。正不敢秦越視也。佳惠附璧。亦遠嫌之意。

復孫魯山

弟某督兵北援。徘徊中道。倏進倏退。空受艱辛。敵寇兩耽。徒應故事。言之汗顏。今已回信辦寇矣。特此奉聞。承諭考事某堂。弟可程少而孤。長而貧。攻苦窮年。秋闈屢蹶。憶先伯以屢中備卷。抑鬱早亡。今舍弟年踰三旬。有志未展。故弟惓惓念之。考期在即。儻文字堪錄。俾得食餼於庠。則拜德無量。若胞弟可模。學既未充。年亦未長。考之利否。應聽自然。弟與模均不敢萌僥倖之想。惟老父母相照。決不敢辱鼎言之及也。

致給諫倪某

近地不靖。何暇遠征。內亂未消。安禦外侮。明明恢復大局。可惟我所爲。而掣肘不舒。心憂徒切。每一念及。淚下沾襟。不意砥礪半生。到此一文不值也。

與雲間諸紳

天禍家國。逆闖橫行。豫楚晉秦。所在淪喪。陵藩肆其蹂躪。黔黎聽其凋殘。用廬聖憂。垂二十載。近者鴟張。北向犯闕無疑。法也聞之。五內震裂。夫西平許國。卽懷內刃之思。太真忘軀。遂瀛登舟之涕。法雖迂疏。淺陋未敢遠附古人。而國難方殷。何敢或後。頃者誓師秣馬。以鼓勤王。而坐乏軍需。點金無術。徬徨中夜。泣下霑衣。且聞同仇者。臣子之心。急公者。烈士之義。獻牛十二。賈人之氣猶雄。指粟一困。朋友之交以篤。矧

夫冠裳大雅。正念在君。君辱臣死。於斯尤甚。伏見諸台臺。踴捐糜之素志。負報國之孤忠。雖潔身修行。或有心難自效。而毀家佐難。亦大義所不辭。僕邀慷慨之懷。爰下芻蕘之賜。則社稷幸甚。天下幸甚。

史忠正公集卷二

家書

家書一

信緊急未知何時可到。又未知父親母親安否。天津城池堅固否。每一念及不禁涕零。惟願父親母親寬懷。不必以男爲念。昨者賊犯六安。我兵三戰三捷。自此軍聲大振。可保地方無事矣。連日因邊情緊急。擬於數日提兵入援。儻就膝下。則萬幸也。如敵騎不退。俟春融冰泮。仍乞父親母親泛棹南來。再圖北上。乃萬全之計也。恐可模不諳事體。必欲冒險進京。萬一中途疏虞。悔之何及。男事情迫切。不敢不直言之。

家書二

十一月十七日。寄書一次。付承差劉應魁。未知到否。聞敵兵漸漸南來。未知父親母親與夫人安否。天津城內可安甯無事否。日日懸念。寢食不甯。如敵兵不退。俟至春間。仍坐船回南。爲是萬不可冒險而行。全在夫人主持。不可再錯。連日賊犯六安。已被殺敗。我身體壯健。不必挂懷。今欲提兵到京。如途中得一相見。便是萬幸。萬一天津不守。夫人惟有一死。萬萬不可貪生受辱也。事到如此。無可奈何。痛甚痛甚。

家書三

初聞父親母親駐天津。憂懼之甚。及承差劉應奎到。據稱城堅可守。始略放心。然終不能釋懷也。茲於二

十五日遇承差汪思誠。知父親母親已於十一月二十五日進京。不勝欣忭。但父親病體尙未大痊。恐到家之後。不無人事應酬。日費艱難。又添憂惱。乞父親凡事寬解。男在外安泰。又流寇三次殺敗。望風遠避。境內一毫無犯。若於臘盡春初。再爲可模完娶。則父親母親心願畢矣。聞母親亦常多恙。未知近日何如。尹大舅聞在蕪湖。今已差人往接。母親不必懸念。帶去秋羅二匹。乃母親吩咐買寄者。京中諸物騰貴。日費艱難。前吳逢順劉應奎寄去些須。恐不足用。不妨暫貸於諸友。容男陸續補還。都中庸醫用藥。不可不慎也。

家書四

初聞在天津住。日夜焦愁。臘月二十五日。汪思誠到。方纔放心。我在外身體安泰。流賊三次殺敗。今已遠去。不須挂念。惟念夫人是一苦命人。別離五箇月。未知身體安否。太爺病體未痊。太太又常多病。我別無倚靠。全賴著夫人。須百凡小心。盡奉侍舅姑之道。度量要寬大些。不可時時愁苦。上天不負好心人。日後受用正無限。量若父母高年。不知後來如何。凡事須順其意。八哥娶親。凡事替他管顧。正是孝順公姑。留意留意。太爺病體。看光景如不能好。夫人還該在家侍奉。萬一有變故。便省得往返奔波。千思萬想。只願夫人作箇大賢大孝之人。斷不可負我一片好心。楊太爺太太及闔家想俱平安。見時爲我致意。

家書五

聞吾弟往來天津。行李無失。父親母親俱得抵京。誠爲幸事。吾提兵入援。已渡黃河而北。聞得近京與山

左告急。兵力寡弱。勢不能前。而流寇復犯江北。不得已引軍還矣。此時都中米珠薪桂。欲寄盤費。恐途次差池。只得待之敵退後。諸親友處。可以借貸權宜行之。有今日之苦。方知前日勸留之爲是也。考期場事。俱不遠。吾弟完婚後。當以進取爲志。嫂子欲來。須在敵退後。或待之秋間。一同前來亦可。母親素多憂慮。當委曲寬解。父親用藥萬不可誤。記之記之。江醫如思家。令齋奏承差有便馬帶來。量給盤費。一路勞苦。俟渠到家酬之可也。

家書六

男屢次具稟。恐路途阻塞。未知到否。十二月二十六日。又差承差許應奎齋稟前去。聞爲亂阻。又未知何日可到。男領兵入衛。已於正月十一日過黃河。今將至滕縣矣。京報已斷月餘。忽得十二月十八起。至二十三日報六本。內提塘官稟稱。父親病已全愈。男不勝忻躍。恐春起脾虛。更難調治。母親身體想亦萬安。乘此春月。當爲可模急完親事。男欲寄些盤費。因途間難行。前令承差丁應揚寄銀三十兩。爲家中雜費。竟被北兵搶去。空自逃回。是以不敢輕寄。都中親友有可借處。父親設法借之。事平路通。男自一一措還。惟望父親母親寬懷。珍重要緊。勿以男爲念。

家書七

自聞信卽擬率師北援。因十一月間。流寇東犯。勢甚洶湧。只得先以辦賊爲急。今幸三捷之後。賊遁境外。始以二千餘督之北行。則時已殘臘矣。月餘京信不通。憂憤之極。連日始有報到。尙是冬至前光景。不知

此時又是何狀也。三太爺在天津。不知何日可到家。彼處城池可守否。儻藉宗社之福。敵早出口。則後會尙自可期。然遭此亂時。骨肉星散。真令人一日九迴腸也。前寄書儀有未用者。以二金奉四太爺過節。一兩奉五嬌母。一兩奉舅太太過節。以二兩奉三弟買書。餘不能概及也。三太爺如早晚到家。卽寄一信。以免懸慮。

家書八

吾領兵到山東地方。得夫人去臘十八日所寄書信。和太爺病勢甚重。又八哥擇臘月二十九日娶親。惟是太爺此病。當不得屢次觸犯。日久必然難好。須夫人專專守候扶持。不可飢飽。不可惹氣。如京中有名醫。可令他用心下藥。包好。重重謝他百金。醫有想頭。自然用心。此第一件最大之事。留心留心。太太娶了八哥媳婦。夫人更要小心。凡事務須含忍。不可存一點成心。只要求公姑歡喜。讓人受得苦。纔是享福之人。北邊破了五七十州縣。不知殺了多少人。昨山東濟南滿城官員家眷。都殺絕了。真是可憐。看到此處。可見凡事有命。爭名奪利。爲身爲家。有何用處。如今我年已長。又無子嗣。父母又在他鄉。不能事奉。若非夫人替我孝順。更靠何人。此第二件最要緊之事。留心留心。楊太太腸窄。凡事須要寬解。夫人雖苦。然上有父母。下有丈夫。凍不著。餓不著。就是目下分離。日後自然聚會。萬一上天見憐。生得一子。受用正自不盡。何必憂愁。就是凡事不如意。都有箇命在。看到他人家破身亡。我們便是有福之人。務要多方勸解。此第三件最要緊之事。以前路上不通。不敢寄盤費。如家中缺用。夫人可將簪珥衣服。或當或賣。暫供日

用。俟我寄銀取贖。莫令太爺太太煩惱。八哥媳婦新到家。凡事勸教他。儘讓他。此第四件最要緊之事。太爺病體如難得好。可密寄一字來。我當預備回去。凡錢糧等件。早早料理。莫待臨時張皇失措。帶去棺木。可於驛車上兩次帶進城備用。此第五件最要緊之事。我領兵到兗州暫住。今已奉旨止回。流賊已殺得他怕了。再不敢來。我身子頗健。並無疾病。不必挂心。李書隨任十年有餘。可將大哥處差使賞他罷。夫人酌之。其餘家人。後來看他。他們跟著做官。徒受清苦。甯可我們淡薄。不可教他們含怨。夫人是極好心人。於我所言。決不見怪。寄去綾機紬二匹。與八哥夫婦。又家間盤費銀三十兩。俱望查收。

家書九

兄督兵到山東。於十九日遇承差吳逢順等。得吾弟兩書。家中事體。多未詳載。最要緊者。莫過父親病勢。傳說甚劇。吾弟卻以爲照舊。何也。如江醫可用。仍令用心調治。不可用。當急訪名醫。令其包好。許以百金爲謝。緩緩調治。又須家中用心扶持。凡事快意。毫無憂愁。毫無煩惱。方可望痊。如萬一難痊。須早寄一字。以便料理。收拾軍馬錢糧。準備交代。萬一有變。吾弟須報知孫魯山父母及胡吉雲年兄。卽議代者。速推受事。庶兄得早回家辦理喪事。言及此。肝腸迸裂矣。城外壽器。須設法運之入城。吾弟完姻後。卽當下帷。流光荏苒。不可錯過。母親心窄。凡事寬解之。尹舅聞在太平。已差承差汪思誠去接。稟明母親。不必懸念。寄去銀三十兩爲家用。不能多者。因道路多梗。恐有不虞也。家眷南來。須在吾弟場完放榜後。嫂孀子如過憂慮。婉言勸解。昨濟南之陷。殺戮甚慘。當此亂世。惟有存好心。行好事。聽天命而已。

家書十

去歲臘月得承差一稟。謂父親病勢增劇。男不勝憂惶。後江醫又稱漸愈。恐是借此寬慰男心。近日春起脾虛。益費調理。未知得如舊否。此病當以寬懷抱節飲食爲主。恐家間無人事奉。男時切懸念。又母親素日多病。不知近來何如。茲督兵入援。已抵東阿。忽奉旨止回。不能至家一看。惟望父親凡事寬解。可模婚事既完。心願已畢。卽家間清苦。有男在。自不必憂衣食也。中軍參將孔登科。已題安慶參將員缺。今渠回宣府搬家眷。如父親母親南來。卽令本將帶家丁隨護。但恐父親病體未愈。非船不行。又可模婚初完。考期不遠。或須俟之八月揭榜後。此在父母上裁。男不敢必也。恐家用缺乏。今寄去銀五十金。又銀杯一隻。父親驗收。若急於南來。缺少盤費。須煩大哥貸處。如俟秋間。則男於七月間。差官帶船迎接。惟候信到。卽遣之行。祖父行狀附寄。清明在卽。似應卽勒之石也。

家書十一

屢得家信。知夫人身體安康喜甚。但不知太爺病體比前如何。又不知太太及楊太爺楊太太近日俱安否。我提兵將到德州。指望到家一看。不料奉旨止回。今回六安去矣。八哥新娶媳婦。凡事教導他。儘讓他。只要父母歡喜。百凡忍耐。上天不負好人。惟願夫人好心底。我孤身在外。所望事奉父母者。惟夫人一人。當念我苦。萬萬不可灰心。太爺飲食全要調理。當委曲勸之。孔中軍回家一看。如太爺要回南來。可僱大轎一乘。騾轎三乘。長騾幾頭。令他帶家丁護來。計其所費不過百金。於大哥處借用。如太爺病體不能

乘轎。可等到八月盡間。還自水路南來。我當於六月間。差人往接。夫人務念公姑爲重。必須太爺病體漸安。再四教來。方可獨自南來。如太爺病重。或家中諸事不妥。夫人離不得。卽不必急急南來。此番各處人妻離子散者。不知多少。卽朱勉齋妻子也被殺。我們合家得免患難。就是絕大的造化。後來夫妻相會。自有好處。惟父母事大。全在夫人委曲盡心。家間門戶要謹慎。待東宅大小人要謙厚些。待使下人要寬些。五孀母事該當相助。但此時手中空乏。不能顧人。今寄去銀十五兩備用。夫人可將首飾變賣用度。將寄去銀。以數兩與之。亦陰德事也。九哥如有志成人。帶到南邊讀書亦可。聽夫人酌之。尹大舅已差人尋找。我因北行。故承差尙未回話。可向太太寬解之。我在任已經年半。再過年半。就該考滿。請誥封。所言覃恩。久已奉旨不准。非我不請也。

家書十二

屢得來信。知家計艱難。人事疏闊處。此時勢不得不然。惟求父母安康。是所急耳。父親病勢。不知近日何如。恐春起脾虛。又費調理。江醫可用卽用。不必求速效也。其家用已給十金。卽充本醫藥費。不必責令償還。尹大舅聞在太平。已差人尋覓。因督兵北行。尙未見有回音。可婉言母親前。免致焦思也。兄巡撫年餘。僅有四百三十金公費。七白金紙贖。而歲用幾至二千兩。其不足者。皆於別項代支。尙無償補之法。近因敵犯內地。又將一年公費。捐以充餉。道途奔走。紙贖全無。窘索太甚。驢市衙衙房價無力辦此。當急已之。此時婚事已畢。急須讀書。一切人事。俱當謝絕。新婦當教以事舅姑之禮。孔中軍已題安慶參將缺。今渠

回家一看。如父母急欲南來。卽僱大轎一乘。騾轎三乘。及騾數頭。令本將帶家丁護來。山東一路。夫頗易僱。合計各項。不過所費百金。卽求大兄那處。似無難事。如父親病劇。難於陸行。則姑待吾弟入場揭榜後。兄於六月之杪。卽撥船遠迎。須預先商定。書到卽行。嫂子心窄性執。凡事當諫勸之。外胡吉雲年兄有手字到。云吾弟考事。但吾弟年尙穉。學未充。當聽自然。不可萌僥倖之想。都中有同年相知來。問父親安者。便中開來。以便書中答謝。其回刺當極謙謹。勿負惓惓。家間門戶宜謹。待下宜恕。寄去五十金及杯一隻。查收。祖父行狀寄去。清明在卽。可與叔父大兄三弟共商。卽勒石。所費於寄銀酌動可也。又與傅鶴汀一字。併銀六兩。可令的當長班送去。不可草率。

家書十三

三月望日。得弟來書。知父親病體尙如舊。母親平安。不勝忻慰。惟弟新婚後。雜以人事。胸中如麻。來書可知也。聞事若無可望。正不如侍父母南來耳。買房一事。當急停止。此時貧甚。那得數百金也。如父母急欲成此。可以婉詞稟之。慶哥一貧至此。令人痛甚。發去三金。給以糊口。家中凡事當體父母之意。南來之期。定於八月之杪。就安慶太平漕船爲便。臨時自有的當官役往迎也。

家書十四

二月二十四日。發一家書。令兵部差官帶去。不知到否。兄於三月初五日到六安。流寇遠遁。地方晏然。惟念父親病體。不知近日何如。母親亦平安否。尹大舅在汪承差處。當卽護送回家也。前寄去墓誌。內有篆

額書丹官銜。查書丹應在前。當用劉年兄銜。篆額用湯公祖銜。如已刻就。不妨改鑄。嫂子處卽以此字示之。三五日後。差人上本。當再寫書也。

遺書

遺書一

敗軍之將不可言勇。負國之臣不可言忠。身死封疆。實有餘恨。得以骸骨歸鍾山之側。求太祖高皇帝鑒此心。於願足矣。乙酉四月十九日。大明罪臣史可法書。

遺書二

不肖兒可法遺稟母親大人。兒在宦途一十八年。諸苦備嘗。不能有益於朝廷。徒致曠遠於定省。不忠不孝。何顏立於天地之間。今人死殉。誠不足贖罪。望母親委之天數。勿復過悲。兒在九泉。亦無所恨。得副將德威完兒後事。望母親以親孫撫之。四月十九日。不肖兒可法泣書。

遺書三

可法死矣。前與夫人有定約。當於泉下相候也。四月十九日。可法手書。

遺書四

可法遺書於叔父大人。長兄三賢弟。及諸弟諸姪。揚城日夕不守。勞苦數月。落此結果。一死以報朝廷。亦復何恨。獨先帝之讐未復。是爲恨事耳。得副將史德威爲我了後事。收入吾支。爲諸姪一輩也。切勿負此。

言四月十九日。可法書於揚城西門樓。

遺書五

可法受先帝厚恩。不能復大讐。受今上厚恩。不能保疆土。受慈母厚恩。不能備孝養。遭時不遇。有志未伸。一死以報國家。固其分也。獨恨不早從先帝於地下耳。四月十九日。可法絕筆。

二十一日遺筆

恭候太太、楊太太、夫人萬安。北兵於十八日圍揚城。至今尙未攻打。然人心已去。收拾不來。法早晚必死。不知夫人肯隨我去否。如此世界。生亦無益。不如早早決斷也。太太苦惱。須託四太爺、大爺、三哥大家照管。炤兒好歹隨他罷了。書至此。肝腸寸斷矣。四月二十一日法寄。

史忠正公集卷四

雜文

甲申討李賊布告天下檄

維崇禎十七年四月朔日。南京參贊機務兵部尙書史可法等。謹以宗社危情。生民至計。布告普天臣子。嘗被今天子十七年之鴻麻。迄高皇帝三百祀之陰騭者。其言曰。竊聞遭朝有道。類多以文事之盛而詘武功。遵會非常。正可以國恩之洪而徵臣節。故天寶亂。而常山睢陽之事香。靖康靡。而宗澤李綱之氣烈。彼皆隱從上作。豈可預知。然且鐵骨錚錚。與艮嶽之峰而並厲。義氣發發。撥雲霓之奏以爭鳴。況休命篤於上天。明德光乎良史。有若本朝者乎。力掃陰霾。二祖之宏謨。號同盤古。治崇寬簡。累朝之熙洽。象擬華胥。乃至今上特興。德勳益備。孝廟之溫恭。儼在世宗之神武。重光當沖齡而埽恭顯之氛。立清宮府。於召對而發龔黃之歎。總爲編氓。以寇起而用兵。是虐民者寇也。而兵非得已。以兵興而派餉。是糜餉者兵也。而餉非自私。顧猶詔旨頻頒。有再累吾民之語。每當天災修省。無一時自逸之心。蔬膳布袍。真能以天下之肥。而忘己之瘠。獨逋宥罪。不難引一人之過。以就臣之名。是宜大業之宏昌。何意諸艱之駢集。理誠莫解。事有可陳。思爲蒼生而得人。上之張羅者誠廣。責以赤心而報主。下之自矢者難言。家家有半閒之堂。事事同小兒之戲。果能功名比曹武惠。詎妨好官之得錢。竟無肝膽似漢淮陰。曾念一人之推食。世俗大

都爾爾賢者一併悠悠。瘞蔽實繁。擔當何狀。圖之不早。病已成於養癰。局尙可爲。涉必窮於滅頂。悲夫。悲夫。邊塵未息。寇餘旋騰。血濺天潢。烽傳陵寢。秦稱天府。誰能封以一丸。晉有霸圖。無復追其三駕。乃者介馬橫馳。夫叢輔。羽書不絕於殿庭。南北之耗莫通。河山之險盡失。天威不測。極知漢天子自有神靈。兵勢無常。豈得謝太傅。但憑歌嘯。留都係四方之率。司馬有九伐之經。義不共天。行將指日。克襄大舉。端賴同警。請無分宦遊。無分家食。或世貴如王謝。或族盛若金張。或子虛之以資起。或輓轅之以談興。乃至射策孝廉。明經文學。亦往往名班國士。藁爲里雄。合無各抒壯猷。各團義旅。仗不需於武庫。糗無壅於郇廚。飛附大軍。力爭一決。但羣策直承黃鉞。豈賊運得有白頭。醜類立殲。普天大酺。此則萬代之所瞻仰。惟九廟爲之鑒臨者也。儻策未暇。夫卽戎必義。且先於助餉。多或抵小國之賦。少則割中人之家。幸濟危機。何弦高之牛足惜。卽非長物。亦曹洪之馬是求。各付有司。轉輸留計。此則事靡從便。氣易爲豪。至登壘巨商。聯田富室。若與縉紳並舉。亦自分誼有殊。然使平準法行。卽陽翟之雄。豈能居其奇貨。又如手實令在。將處士之號。未可保其素封。凡稱多算之有餘。總賴聖恩之無外。欲與共爲義士。多方亦賴同盟。徧植佳緣。無忘善誘。譬如同舟之誼。但凡在千八百國。疇非王臣。揆諸恤緯之心。決不至四十二城。遂無男子。嗚呼。視郊乃雍容之事。唐莊尙有崇韜。出塞本僥倖之圖。漢武乃逢卜式。矧此何日。敢曰無徒。不惟社稷之憂。卽是身家之算。始賊之巧於爲餌。時亦有優孟之仁。迨我之旣入其樊。莫不攫地獄之罰。齊姜宋子。相牽而入。平康珠戶。綺窗所過。便成甌脫。來俊臣之刑具。則公卿之被拷者。痛嘗鄭安國之畫圖。與老弱之受傷。

者。酷肖。是皆難民所說。足令聽者寒心。夫連歲報陷。如五臺。太原。武昌等處。皆行省也。其中金穴何止一家。牙籤正不勝紀。若六時之牛酒不乏。雖八公之草木可驅。只坐一愜。遂成胥溺。豈不冤哉。欲圖穩著。須問前車。誠清夜而念上恩。雖何曾之萬錢。有難下咽。更援古以籌時象。豈王衍之三窟。便可藏身。同舟卽一家。破巢無完卵。可不思之思之。又重思之也哉。法等智不足以效謀。憤何辭於卽死。實切執爰之願。輒通託鉢之呼。人理苟存。我求必遂。如或纏情阿堵。絕念封疆。睢陽之援竟停。則霧雲抽誓言之矢。荊州之粟獨擁。則溫嶠有迴指之旗。封章尙達於北辰。奮筆敢驚於南史。所爲過計。亦屬癡衷。見起君親。約昭天日。法等無任斫地呼天。捶心泣血之至。謹檄。

祭左忠毅公文

維崇禎乙亥冬之仲月。門生史可法奉命整飭安池。駐節江上。悵望皖公。知大中丞左師藏靈於皖山之麓。松鶴書院。因不勝嗚咽。特卜於十二日。以剛蠶柔毛清酌庶品之儀。拜於墓側。而奠之。曰。嗚呼。吾師生平著作。獨取法於韓蘇。報國孤忠。嘗自方於陳寶。文章氣節。蓋海內正人君子所共宗也。天啓乙丑。觸忤權璫。羣小朋搆。而下緹騎之詔。法卽爲師涕淚之無從矣。迨躡桐封。聞師之太翁哭師之孝。師之伯氏叔氏哭師之弟。師之嗣世哭師之慈。門以內哭師之義。亞旅咸獲哭師之仁。以至族閭姻婭哭師之媿。睦朋儕居游哭師之任恤。甚而通邑之知與不知。莫不哭師之忠而被謗。直而受誣。一時天地且爲師感泣。山岳且爲師崩頽。風雲且爲師變色。而拜旨時。駢肩塞巷者。咸豎髮裂眦。欲得闔宦而甘心焉。會幾何時。九

五當陽。冰山銷毀。聖主昭其血碧。舉國式其幽丹。聲名光史冊。貞珉賁巖阿。卽餘英所振。猶使虺伏狐摧。至今不敢躑躅於冰霜之漸。則師之死賢於生遠矣。更何憫乎。雖然法之哭師痛師者。至今日猶戚戚也。蓋師素擅文名。更稱冰鑑。當其提衡冀北。八郡羣空。法甫弱冠。亦隨行逐隊。步諸生後。聲名固寂如也。師不以爲不才。而拔之以冠八郡。且謂法曰。爾當於卯辰脫穎去。維時法未之信。不虞兩試暴腮。果以卯辰售也。從來文字遇合有奇焉如此者乎。且師之於法。固不第文字之知己也。又因法貧甚。而館之宦邸中。每遇公餘。卽懸榻以俟。相與抵掌時事。辨論古今。不啻家人父子之歡。猶憶逆璫陷師於獄。一時長安搖手相戒。無往視者。法不忍以逆餒。故而避之。微服過從。一慰痛楚。師見而嚮蹙曰。爾胡爲乎來哉。唯恐夏馥之載禍相餉也。瀕危若是。而尙慮以相知見累。師真師而父母矣。濡首深思。每懷靡及。竊願他日得一第。或可少酬知遇。而今幸奉簡書。勞勞皖國。正所謂志士酬知之會也。師乃高臥松楸。徒懸纒帳。華表之鶴不返。龍門之月空明。法所爲一睇龍山鳳石。而忽不禁血淚之盈盈也。師之嗣世。皆血汗神駒。早暮間卽飛黃騰達。大忠貞之報。埏埴固無所事。法卽謀片石。繪師忤璫之故。白師忠烈之心。以垂之永久。塑師像社。而祝之於文公朱邑之間。里之好義者。當饒爲之。又不待法之嗷嗷也。鬱鬱此懷。何以自達。惟有引清泉拊白石。擗踊以歌之曰。泰山其頽。吾將安仰。梁木其壞。哲人其萎。吾將安放也。已矣。

祭廬州殉難官紳士民文 勒碑六安州學署

維崇禎十五年歲在壬午孟冬辛亥月。越祭日癸卯。欽命總督漕運提督軍務巡撫鳳陽等處兼理海防

戶部右侍郎兼都察院右都御史可法。謹以牲醴香楮之儀。致祭於廬州府通判鶴天趙君興基。翰林編修吉雲。胡君守恆。南京光祿寺卿靖符錢君策。雲南布政司參政畸人程君楷。原任南京旗手衛總司趙君之璞。廬州衛經歷鄭君元壽。崇明把總金君玉度。六安衛指揮喬君允遷。千戶張君國政。巢縣典史韓君思義。府屬諸生江君源洞。黃君中理。耆民劉鉉等之靈。曰。嗚呼。今夏賊陷龍舒。暨於郡城。無巢六霍諸州邑。後先俱失。余聞報淮上。悲憤不欲生。已乃搥腕呼天訴之曰。余實不德。其官紳士民何罪。而乃堪此厄也。傷已九月。余竣事於輸挽之役。策馬西征。目擊荒草迷途。烟炊斷絕。遺骸市地。怨氣凝纏。嗟哉。死者不可紀極。而生者殘肢斷腕。同於人彘之形。抑更悲矣。憶昔余之禦寇安廬也。馬首所及。諸生迎於郊。百姓迎於路。賢士大夫候於庭。相與勵師徒。畫籌策。修守具。備餼糧。若同舟之遇風。同室之助鬪。家人骨肉之誼。何其肫然。而今已矣。奉簡書而治兵者。虛擁纛牙。遺羞巾幗。視秦庭之哭耳。如不聞。而援絕力窮。城頭慘死。乃在郡佐之大夫。衛幕之散員。豈不慟哉。守土之吏。印纍纍。綬若若。平日苛政如虎。不以百姓爲心。一旦賊薄城下。手足無措。相與抱頭鼠竄。視民城如敵。屣然而奮。不顧身。手刃賊衆。整冠危坐。誓死不移。乃在鄉士大夫。二三烈弁。豈不慟哉。又不然。則平日號爲賢紳。以海內清流自負。論長持短。不難居是邦。而非大夫。意其臨難不知如何激烈。乃束手就縛。長跪乞哀。叩幾千百首。倖全其就木餘生。爲節義名鄉之辱。而登陴固守。城破之日。視死如歸。竟在守禮之子衿。飢窮之黎庶。豈不慟哉。余爲諸公慟。士民慟。而幾無以自解也。爲之請於朝。如趙君之死於城頭也。或以爲酒醉。或以爲疏防。余爲之辯雪。而懷慄

大節。乃暴著於天地間。意趙君之死無憾矣。如太史胡君。勳卿。錢君。大參。程君。旗總趙君等。或以爲激變。或以爲死遲。余爲之辯雪。而懷懷大節。乃暴著於天地間。意諸君之死無憾矣。如諸生江源洞等。耆民劉鉉等。死不一人。死不一地。卽不能起九原。問其姓名。要皆櫻白刃而不悔。甯玉碎無瓦全。以視他人之偷生。究與草木同腐者。何啻霄壤。然則諸生士民之烈烈而死。亦何憾乎。而余又何憾乎。余所慟者。昊天不愍。降此荼毒。上不能矯箭控弦。竭縣力於皖上。受事之日。滅此朝食。次之兩淮督運。不能決樽俎。分符轉戰。有獻俘斬馘之功。下之不能周歷郡縣。嬰城固守。爲父老子弟議保聚。數者無一。遂碌碌取容。而波頹瀾倒於半載之內。嗟嗟。尙何言哉。尙何言哉。雖然。余之罪大矣。重矣。而余之心。何嘗不共白也。羸衣躍馬。念止在民。仗鉞臨戎。惟力是視。諸公士民。尙鑒茲哉。余用是益自悲矣。溝壑者烈士之志。馬革者臣子之心。異日天子下璽書。祀明堂。銘鐘鼎。生有顯業。死有榮名。爲諸公者。可以揚揚地下矣。獨是千百萬億之士民。或蹈水火。或殞刀兵。或轉溝壑之區。或粉戎馬之足。遠近畢至。大小率從。今西望固陵。東眺姥山。南憑冶父之衢。北極毛公之城。淒風飄發。黃雲四垂。陰焰冥迷。青燐滿目。余之慟將何時而已也。所願生爲怨苦之人。死則化爲厲鬼。以助余前驅。翦爾仇讐也。余有心爾能付度。余有言爾能聽取。苟可以聽余之言。度余之心。亦可以惠然與諸公共歆余之饗矣。

邀助左公子啓

原任北直學院左大宗師。立朝勁節。昭昭人世。更脈脈吾黨。四壁如洗。二萬懸坐。在逆璫原以株連赤族。

之法，巧寓追賊，而郡縣自不敢於風波震撼之中，偶露矜恤，將累世所遺，積俸所置，囊罄合族，席捲同宗，歷盡敲呼之苦，僅得十分之七，士紳戒心於後禍，貴戚厭志於前來，路盡途窮，只得向朝不保夕之周親，爲剝肉補瘡之義貸，隱忍當日，屈指今朝，目今皇仁浩蕩，雖邀贈廕之虛名，而恩債浮沈，仍受喪家之實禍，左世兄謝恩北上，蕭居京邸，進不敢陳乞聖明，退無以施顏貧戚，不惟八口待命，亦復衆姓嗷嗷，傾家之德難忘，活命之恩忍負，麥舟大義，豈讓旁觀，道義交情，正屬我輩，祈諸位道兄，弔先師於既往，敬愛如生，助賢嗣於窮途，樂周不倦，願出者自書姓名，單到時轉相告語，臨啓不勝懇切祈望之至。

乞閒詠序

魏公六岳詩，成於解府事之後者也。故題曰乞閒。其章亂曰：不堪回憶處，昨日未閒身。予讀之憮然。昔范龍圖尊顯用事，白髮憂邊，因憶與周道士王逸人輩，聞笛圭峰之墅，至爲沾襟。曰：彼吹笛生，何其遠也。以范公所歎，合魏公所詠，其未閒念閒，古今同情若此。第閒有多門，幽人貞士之閒，則吹笛生是也。至大人元老之閒，其道益不可言。漢建武以吏事責三公，功臣率不任職，蟬貂鐘鼎之列，一時多閒人矣。然史言膠東侯復剛直多大節，及以侯就第，惟闔門養威重，夫威重之臣，豈國家可少哉。蓋帝用侯於四方，孰與用侯於闔門，且珍寶者，山陵挾以爲重，蛟龍者，江海挾以爲威，威與重政以恆在人耳目之外，史寫侯以闔門兩字，真爲妙於下語。故元老大人之用，莫要於能閒，以對治驚坐孟公，置驛鄭莊，正爾日劇場中一大藥。公固今代之膠東耶。至其詩感慨時艱，嗟懷宗國，一片天真浮動毫楮，閒之用又不足以盡之。若學

者但解憶圭峰笛聲。尋岳陽樓記。便是枉卻此詩。
詩

六安署病中感懷

待理猶煩苦抱疴。公餘側枕奈如何。民飢由已嗟艱食。兵悍逢人欲弄戈。撫字無能先布德。催科甯忍復爲苛。白雲交瘁燕山下。國手誰憐妙劑多。

憶母 時督兵白洋河。

母在江之南。兒在淮之北。相逢敝夢中。牽衣喜且哭。

燕子磯口占 時奉召勦左兵。

來家不面母。咫尺猶千里。磯頭灑清淚。滴滴沈江底。

四書文

子曰若聖與仁則吾豈敢抑爲之不厭。誨人不倦則可謂云爾已矣。公西華曰。正唯弟子不能學也。聖人不欲終聖仁之統。而與弟子共留之焉。蓋聖仁以夫子爲終。而非以爲誨衍之。將弟子而後更誰學之乎。嘗聞能受人益易。無受天損難。是故全乎人。不若全乎天。然而全乎天。曷若全乎已。天下事必自我操之。則四海無功。不自我深之。則百年無學。聖人於此。以已之學。救弟子之窮。卽以弟子之學。救聖人之窮。由此道也。若夫子非當世所共尊。聖仁而願學之者哉。然聖仁之統。雖以夫子爲終。而學人之修。實以

夫子爲始。使其尊聖仁而孤處焉。無論凡庸退避。將疑絕學之窮。或極學力攀援。究致統緒之絕。夫子所以觀一身觀天下。而急以爲誨爲弟子告也。就聖仁之欲竟者。借爲誨以續之。而至極之理。始不卽於孤。且聖仁之已見者。得爲誨以新之。而日變之途。愈莫窮其致。是豈徒謝聖仁之名。而退然不勝也哉。極神化於一往。則願想所至。卽是他人爭赴之階。而化遵途於不知。則過續相生。亦誰不在變通之內。夫子固曰。吾與天下後世相質於無窮者。此豈敢一念云爾。今試靜而思焉。乃知聖仁之事。雖經屢遷。而志力終於無已。卽聖仁之人。不必相接。而幾希自可相尋。但使此豈敢一念。日往月來。則羣聖之氣。得一人鼓唱。而統緒可尊也。且百世之心。從吾黨遍啓。而隱微俱動也。公西華能無爽然於學之不能也哉。得其所謂不能者。則人也。我也。聖仁也。爲誨也。俱往復於無端。而聖仁之統。其不自夫子而終也久矣。

爲天下得人者謂之仁

薄其心於天下。仁主所以獨勞也。夫爲天下得人。則已合天下爲一心矣。以是而謂仁。夫何歉乎。且大人以一心開天下之先。則必統天下於元德。而後開闢之功。萬世無偶焉。故天以其仁託之君。君以其仁託之人。亦其元氣之渾淪。有不得而破焉者也。如堯舜之得人。夫亦直畢已憂耳。而抑知憂固仁之所生也哉。迄於今。中天已邈。才運已湮。而天下咸謂仁后焉。亦其爲天下之心有獨至也。天下渾備一仁。而苦於莫剖。自有人以疏之。而人物之界。始各安於生成之位。而不干其和。人又各載一仁。而虞其莫匯。有得人者以統之。而朝野之神。始渾聚於網繆之天。而不滲其象。聖主之視其身也。原非已有。故耳目之官各有

所寄。而又非爲一己之耳目也。直並幽陬之四聰四明。合參其消長之分數。而開天之精靈。固已公之於萬姓也。夫仁莫大於公天下。而轉給者其眇已。聖主之視其人也。原非憑運。故心膺之寄。確有所鍾。而非爲一己之心膺也。直翕含生之疴癢瘁榮。遍給以渾沌之生趣。而統天之鈞鑄。固已再造於羣蒙也。夫仁莫神於造天下。而溉潤者其粗已。蓋萬靈之性命。統聚於一二人。而後民物繁生。不妨各乘其害氣。此造化之妙於仁也。心乎天下者。已於疇咨之內。偕萬靈之性命。而噓。則施濟之奇。不動於聲色也。渾乎生機之廣遠而已矣。庶類之天心。總會於作人之人。而後氣數遷流。不妨遞構其險阻。此天下之化於仁也。存心得人者。獨舉川岳之靈。憑庶類之天心而造。則大生之柄。不屬之乾坤也。倉然元氣之獨闢而已矣。是故生人者。與天。而其仁祇在一世。故才連遞乘。而貞元之氣已薄。得人者。與人。而其仁直在萬世。故平成雖遞。而如天之宇常寬。則通天下爲一仁。而大人之事畢矣。

史忠正公集

附錄

明史本傳

史可法字憲之。大興籍。祥符人。世錦衣百戶。祖應元舉於鄉。官黃平知州。有惠政。語其子從質曰。我家必昌。從質妻尹氏有身。夢文天祥入其舍。生可法。以孝聞。舉崇禎元年進士。授西安府推官。稍遷戶部主事。歷員外郎。郎中。八年遷右參議。分守池州太平。其秋。總理侍郎盧象昇大舉討賊。改可法副使。分巡安慶池州。監江北諸軍。黃梅賊掠宿松。潛山。太湖。將犯安慶。可法追擊之。潛山天堂寨。明年。祖寬破賊滁州。賊走河南。十二月。賊馬守應合羅汝才李萬慶自鄖陽東下。可法馳駐太湖扼其衝。十年正月。賊自閩道突安慶石埭。尋移桐城。參將潘可大擊走賊。賊復爲廬鳳軍所扼。回桐城。掠四境。知縣陳爾銘嬰城守。可法與可大剿捕。賊走廬江犯潛山。可法與左良玉敗之楓香驛。賊乃竄潛山太湖山中。三月。可大及副將程龍敗歿於宿松。賊分其黨搖天動別爲一營。而合八營二十餘萬衆。分屯桐城之練潭石井陶沖。總兵官牟文綬劉良佐擊敗之挂車河。當是時。羣寇聚漳甯。分犯岷洮。秦楚應皖羣盜遍野。總理盧象昇既改督宣大。代以王家禎。祖寬關外兵亦北歸。未幾。上復以熊文燦代家禎。專撫賊。賊益狂逞。盤牙江北。南都震驚。七月。擢可法右僉都御史。巡撫安慶。廬州。太平。池州四府。及河南之光州。光山。固始。羅田。湖廣之蘄州。

廣濟、黃梅、江西之德化、湖口、諸縣提督軍務。設額兵萬人。賊已東陷和州、含山、定遠、六合。犯天長、盱眙。趨河南。可法奏免被災田租。冬，部將汪雲鳳敗賊潛山。京軍復連破老回回舒城、廬江。賊遁入山。時監軍僉事湯開遠善擊賊。可法東西馳禦。賊稍稍避其鋒。十一年夏，以平賊踰期戴罪立功。可法短小精悍，面黑目爍，爍有光，廉信，與下均勞苦。軍行，士不飽不先食，未授衣不先御，以故得士死力。連敗賊英山、六合、順天王、乞降。十二年夏，丁外艱去。服闋，起戶部右侍郎，兼右僉都御史，代朱大典總督漕運，巡撫鳳陽、淮安、揚州，劾罷督糧道三人，增設漕儲道一人。大濬南河。漕政大釐。拜南京兵部尚書，參贊機務。因武備久弛，奏行更新八事。十七年四月朔，聞賊犯闕，誓師勤王。渡江，抵浦口。聞北都既陷，縞衣發喪。會南都議立君。張慎言、呂大器、姜曰廣等曰：「福王由崧，神宗孫也，倫序當立。而有七不可：貪、淫、酗酒、不孝、虐下、不讀書、干預有司也。」潞王常淂，神宗姪也，賢明當立。移牒可法，可法亦以爲然。鳳陽總督馬士英與阮潛大鉞計議，主立福王。咨可法，可法以七不可告之。而士英已與黃得功、劉良佐、劉澤清、高傑發兵送福王至儀真。於是可法等迎王。五月朔，王謁孝陵，奉先殿，出居內守備府。羣臣入朝，王色赧欲避。可法曰：「王毋避，宜正受。」既朝，議戰守。可法曰：「王宜素服郊次，發師北征，示天下以必復讐之義。」王唯唯。明日再朝，出議監國事。張慎言曰：「國虛無人，可遂卽大位。」可法曰：「太子存亡未卜，倘南來若何，誠意伯劉孔昭曰：「今日既定，誰敢復更。」可法曰：「徐之乃退。」又明日，王監國。廷推閣臣，衆舉可法。高宏圖、姜曰廣、孔昭攘臂欲並列，衆以本朝無勳臣入閣例，退之。孔昭勃然曰：「卽我不可，馬士英何不可。」乃并推士英。又議起廢，推鄭三俊、劉宗周、徐石

獻。孔昭舉大餓。可法曰：先帝欽定逆案，毋復言。越二日，拜可法禮部尙書，兼東閣大學士。與士英宏圖並命。可法仍掌兵部事。士英仍督師鳳陽。乃定京營制，如北都故事。侍衛及錦衣衛諸軍，悉入伍操練。錦衣東西兩司房，及南北兩鎮撫司官，不備設，以杜告密。安人心。當是時，士英旦夕冀入相，及命下，大怒。以可法七不可書奏之王，而擁兵入覲，拜表卽行。可法遂請督師出鎮淮揚。十五日，王卽位。明日，可法陛辭。加太子太保，改兵部尙書。武英殿大學士士英卽以是日入直，議分江北爲四鎮。東平伯劉澤清、轄淮海，駐淮北。經理山東一路。總兵官高傑、轄徐泗，駐泗水。經理開歸一路。總兵官劉良佐、轄鳳壽，駐臨淮。經理陳杞一路。靖南伯黃得功、轄滁和，駐廬州。經理光固一路。可法啓行，卽遣使訪大行帝后梓宮，及太子二王所在。奉命祭告泗鳳二陵。可法去。士英孔昭輩益無所憚。孔昭以慎言舉吳姓，諱殿上，拔刀逐慎言。可法馳疏解。孔昭卒扼姓不用。可法祭二陵畢，上疏曰：陛下踐阼初，祇謁孝陵，哭泣盡哀，道路感動。若躬謁二陵，親見鳳泗，蒿萊滿目，雞犬無聲，當益悲憤，願慎終如始。處深宮廣廈，則思東北諸陵魂魄之未安。享玉食大庖，則思東北諸陵麥飯之無展。膺圖受籙，則念先帝之集木馭朽，何以忽遘危亡。早朝晏罷，則念先帝之克勤克儉，何以卒墜大業。戰兢惕厲，無時怠荒。二祖列宗，將默佑中興。若晏處東南，不思遠略，賢奸無辨，威斷不靈。老成投簪，豪傑裹足。祖宗怨恫，天命潛移。東南一隅，未可保也。王嘉謩之得功，澤清、傑，爭欲駐揚州。傑先至，大殺掠，屍橫野，城中恟懼。登陴守，傑攻之。浹月，澤清亦大掠淮上。臨淮不納良佐軍，亦被攻。朝命可法往解，得功、良佐、澤清皆聽命。乃詣傑，傑素憚可法。可法來，傑夜掘坎十百，埋暴骸。旦日朝

可法帳中辭色俱變。汗浹背。可法坦懷待之。接偏裨以溫語。傑大喜過望。然傑亦自是易可法。用己甲士防衛。文檄必取視而後行。可法夷然爲具。疏屯其衆於瓜洲。傑又大喜。傑去揚州以安。可法乃開府揚州。六月大清兵擊敗賊李自成。自成棄京師西走。青州諸郡縣爭殺僞官。據城自保。可法請頒監國登極二詔。慰山東河北軍民心。開禮賢館。招四方才智。以監紀推官應廷吉領其事。八月。出巡淮安。閱澤清士馬。返揚州。請餉爲進取資。士英斬不發。可法疏趣之。因言邇者人才日耗。仕途日濇。由名心勝而實意不修。議論多而成功少。今事勢更非昔比。必專主討賊。復讐合籌。兵籌餉無議論。舍治兵治餉無人才。有撫拾浮談巧營華要者。罰無赦。王優詔答之。初。可法虞傑跋扈。駐得功儀真防之。九月朔。得功傑構兵。曲在傑。賴可法調劑。事得解。北都降賊諸臣南還。可法言諸臣原籍北土者。宜令赴吏兵二部錄用。否則恐絕其南歸之心。又言北都之變。凡屬臣子皆有罪。在北者應從死。豈在南者非人臣。卽臣可法謬典南樞。臣士英叨任鳳督。未能悉東南甲疾趨北援。鎮臣澤清傑以兵力不支。折而南走。是首應重論者。臣等罪也。乃因聖明繼統。鈇鉞未加。恩榮疊被。而獨於在北諸臣。毛舉而槩繩之。豈散秩閒曹。責反重於南樞。鳳督哉。宜摘罪狀顯著者。重懲示儆。若僞命未污。身被刑辱。可置勿問。其逃避北方。徘徊而後至者。許戴罪討賊。赴臣軍前酌用。廷議並從之。傑居揚州。築鷲甚。可法開誠布公導以君臣大義。傑大感悟。奉約束。十月。傑帥師北征。可法赴清江浦。遣官屯田開封。爲經略中原計。諸鎮分汛地。自王家營而北。至宿遷最衝要。可法自任之。築壘綠河南岸。十一月四日。舟次鶴鎮。謄報我大清兵入宿遷。可法進至白洋河。令總兵官劉

肇基往援。大擘兵還攻邳州。肇基復援之。相持半月而解。時自成既走陝西。猶未滅。可法請頒討賊詔書。言自三月以來。大擘在目。一矢未加。昔晉之東也。其君臣日圖中原。而僅保江左。宋之南也。其君臣盡力楚蜀。而僅保臨安。蓋偏安者。恢復之退步。未有志在偏安。而遽能自立者也。大變之初。黔黎灑泣。紳士悲哀。猶有朝氣。今則兵驕餉絀。文恬武嬉。頓成暮氣矣。河上之防。百未經理。人心不肅。威令不行。復讐之師。不聞及關陝。討賊之詔。不聞及燕齊。君父之讐。置諸膜外。夫我卽卑宮菲食。嘗膽臥薪。聚才智精神。枕戈待旦。合方州物力。破釜洗舟。尙虞無救。以臣觀廟堂謀畫。百執事經營。殊未盡然。夫將所以能克敵者。氣也。君所以能馭將者。志也。廟堂志不奮。則行間氣不鼓。夏少康不忘出竇之辱。漢光武不忘藝薪之時。臣願陛下爲少康光武。不願左右在位。僅以晉元宋高之說進也。先皇帝死於賊。恭皇帝亦死於賊。此千古未有之痛也。在北諸臣。死節者無多。在南諸臣。討賊者復少。此千古未有之恥也。庶民之家。父兄被殺。尙思穴胸斷脰。得而甘心。況在朝廷。願可漠置。臣願陛下速發討賊之詔。責臣與諸鎮。悉簡精銳。直指秦關。縣上爵以待有功。假便宜而責成效。絲綸之布。痛切淋漓。庶海內忠臣義士。聞而感憤也。國家遭此大變。陛下嗣登大寶。與先朝不同。諸臣但有罪之當誅。曾無功之足錄。今恩外加恩未已。武臣腰玉。名器濫觴。自後宜慎重。務以爵祿待有功。庶猛將武夫有所激厲。兵行最苦無糧。搜括既不可行。勸輸亦難爲繼。請將不急之工程。可已之繁費。朝夕之燕衍。左右之進獻。一切報罷。卽事關典禮。亦宜概從節省。蓋賊一日未滅。卽有深宮曲房。錦衣玉食。豈能安享。必刻刻在復讐雪恥。振舉朝之精神。萃萬方之物力。盡併於選

將練兵一事。庶人心可鼓。天意可回。可法每繕疏。循環諷誦。聲淚俱下。聞者無不感泣。比大清兵已下邳。宿。可法飛章報。士英謂人曰。渠欲敍防河將士功耳。漫弗省。而諸鎮遂巡。無進師意。且數相攻。明年。是爲大清順治之二年。正月。餉缺。諸軍皆饑。頃之。河上告警。詔良佐得功。率師扼潁壽。傑進兵歸徐。傑至睢州。爲許定國所殺。部下兵大亂。屠睢旁近二百里。殆盡。變聞。可法流涕頓足。歎曰。中原不可爲矣。遂如徐州。以總兵李本身爲提督。統傑兵。本身者傑甥也。以胡茂順爲督師中軍。李成棟爲徐州總兵。諸將各分地。又立傑子元爵爲世子。請恤於朝。軍乃定。傑軍旣還。於是大梁以南皆不守。士英忌可法威名。加故中允。衛允文兵部右侍郎。總督輿平軍。以奪可法權。允文。傑同鄉也。陷賊南還。傑請爲己監軍。傑死。允文承士英旨。疏誚可法。士英喜。故有是命。駐揚州。二月。可法還揚州。未至。得功來襲輿平軍。城中大懼。可法遣官講解。乃引去。時大兵已取山東河南。北逼淮南。四月朔。可法移軍駐泗州。護祖陵。將行。左良玉稱兵犯闕。召可法入援。渡江。抵燕子磯。得功已敗。良玉軍。可法乃趨天長。檄諸將救盱眙。俄報盱眙已降。大清泗州援將侯方巖全軍沒。可法一日夜奔還揚州。訛傳定國兵將至。藏高氏部曲。城中人悉斬關出。舟楫一空。可法檄各鎮兵無一至者。二十日。大清兵大至。屯斑竹園。明日。總兵李棲鳳。監軍副使高歧鳳。拔營出降。城中勢益單。諸文武分陣拒守。舊城西門險要。可法自守之。作書寄母妻。且曰。死葬我高皇帝陵側。越二日。大清兵薄城下。礮擊城西北隅。城遂破。可法自刎不殊。一參將擁可法出小東門。遂被執。可法大呼曰。我史督師也。遂殺之。揚州知府任民育。同知曲從直。王纘爵。江都知縣周志畏。羅伏龍。兩淮鹽運使楊振。

熙監餉知縣吳道正。江都縣丞王志端。賞功副將汪思誠。幕客盧渭等皆死。可法初以定策功。加少保。兼太子太保。以太后至。加少傅。兼太子太傅。敍江北戰功。加少師。兼太子太師。擒劇盜程繼孔功。加太傅。皆力辭。不允。後以宮殿成。加太師。力辭。乃允。可法爲督師。行不張蓋。食不重味。夏不箠。冬不裘。寢不解衣。年四十餘。無子。其妻欲置妾。太息曰。王事方殷。敢爲兒女計乎。歲除。遣文牒。至夜半。倦。索酒。庖人報殺肉已分給將士。無可佐者。乃取鹽豉佐之。可法素善飲。數斗不亂。在軍中絕飲。是夕進數十觥。思先帝泫然淚下。凭几臥。比明。將士集轅門外。門不啓。左右遙語其故。知府民育曰。相公此夕臥。不易得也。命鼓人仍擊四鼓。戒左右毋驚相公。須臾。可法寤。聞鼓聲。大怒曰。誰犯吾令。將士述民育意。乃獲免。嘗子處鈴閣。或舟中有言宜警備者曰。命在天。可法死。覓其遺骸。天暑。衆屍蒸變。不可辨識。踰年。家人舉袍笏招魂。葬於揚州郭外之梅花嶺。其後四方弄兵者。多假其名號以行。故時謂可法不死云。可法無子。遺命以副將史德威爲之後。有弟可程。崇禎十六年。進士。擢庶吉士。京師陷。降賊。賊敗。南歸。可法請置之理。其忠毅類如此。贊曰。史可法。憫國步多艱。忠義奮發。提兵江滸。以當南北之衝。四鎮綦布。聯絡聲援。力圖興復。然而天方降割。權臣掣肘於內。悍將跋扈於外。遂致兵頓餉竭。疆圉日蹙。孤城不保。志決身殲。亦可悲矣。

畿輔志列傳

史可法字道鄰。大興人。原籍祥符。崇禎戊辰進士。性孤耿。有志略。崇禎末。歷官南京兵部尙書。聲望峻偉。甲申。聞國破。涕泣三日。夜繼而忠奮自命。志滅賊報讐。擁立福王於金陵。拜內閣大學士。自請督師。駐節揚州。會我朝定鼎於燕京。可法上書攝政王。悲慟淋漓。累數千言。圖存社稷。乙酉。大兵攻維揚。可法竭力禦守。城破。不屈死。

左史逸事

方苞

先君子嘗言。鄉先輩左忠毅公。視學京畿。一日風雪嚴寒。從數騎出。微行入古寺。廡下一生伏案臥。文方成草。公閱畢。卽解貂覆生。爲掩戶。叩之寺僧。則史公可法也。及試。吏呼名至史公。公瞿然注視。呈卷。卽面署第一。召入。使拜夫人曰。吾諸兒碌碌。他日繼吾志事。惟此生耳。及左公下廠獄。史朝夕獄門外。逆奄防伺甚嚴。雖家僕不得近。久之聞左公被炮烙。旦夕且死。持五十金。涕泣謀於禁卒。卒感焉。一日使史更敝衣草屨。背筐。手長鑱。爲除不潔者。引入。微指左公處。則席地倚牆而坐。面頰焦爛不可辨。左膝以下筋骨盡脫矣。史前跪。抱公膝而嗚咽。公辨其聲。而目不可開。乃奮臂以指撥眚。目光如炬。怒曰。庸奴。此何地也。而汝來前。國家之事。糜爛至此。老夫已矣。汝復輕身而昧大義。天下事誰可支柱者。不速去。無俟奸人搆陷。吾今卽撲殺汝。因摸地上刑械。作投擊勢。史噤不敢發聲。趨而出。後常流涕述其事。以語人曰。吾師肺肝。皆鐵石所鑄造也。崇禎末。流賊張獻忠出沒。斬黃潛桐間。史公以鳳廬道奉檄守禦。每有警。輒數月不就寢。使將士更休。而自坐幄幕外。擇健卒十人。令二人蹲踞而背倚之。漏鼓移。則番代。每寒夜起。立振衣裳。甲上冰霜迸落。鏗然有聲。或勸以少休。公曰。吾上恐負朝廷。下恐愧吾師也。史公治兵。往來桐城。必躬造左公第。候太公太母起居。拜夫人於堂上。余宗老塗山。左公壻也。與先君子善。謂獄中語。乃親得之於史公云。

公懇留在朝疏

竊謂撥亂反治。必天生聖明之君。翊運扶艱。尤帝賈忠良之佐。故漢光復起。司徒功冠於寇馮。唐肅再興。鄴侯勳先於李郭。蓋以不離帷幄。故掃除既藉。其權謀。身在朝廷。卽跋扈亦資其彈壓。今者乾坤再造。日月重光。幸遇陛下。河清應瑞。鳳舞興祥。卜鼎於高皇。創造之基。承休於列聖。丕隆之後。識天心之有自知。人意之咸歸。臣等竊意安危之係。在於立政之初。聚散之形。卽此用人之始。伏見初臨監國。首擢南京兵部尙書史可法。授東閣大學士。仍管部務。羣心踴躍。萬姓歡呼。咸頌陛下知人善任。遠追堯舜。則哲之明。用人求舊。近鑒元老。壯猷之績。旣畀之以調元贊化之職。仍責之以詰戎奮武之能。此真聖人大度。神武嘿成之事也。誠以樞臣史可法。冰心鐵骨。浩氣清思。仰望係南北之障。固其鍊事之所至。亦其積威之所成。先帝眷注彌加。倚畀獨重。然不用之於北樞。而用之於南樞者。固天牖先帝之心。留此以佐陛下。今日中興之業者也。顧南都積弛之後。未易蒙安。自樞臣整頓以來。漸堪驅策。經營在一載之間。堅瑕係全局之重。人材聞之而湊集。一經其目。便真僞大小之畢形。政事遇之而悉周。凡在所司。雖寒暑且昏而不廢。蓋以其無欲。故能知人。以其不倦。故能舉政。真救時之宰相。濟世之忠良也。今陛下奠安南服。則情形敏鍊之熟。無踰可法。鼓銳北征。則廟堂籌策之能。亦無踰可法。諸將之所素服。逆賊之所素畏。亦無踰可法。由其才望之隆。足爲控制。更以忠誠之篤。可格奸邪。目今詔令初頒。人心甫定。衆正畢升。羣小亦無不覲望。長城方壯。鼠狐正畏其潛萌。只以可法秉志清剛。毫無顧忌。故同列皆碩望名臣。引用無宵人敗類。不

獨用兵勦守事宜。資其成算。抑亦人才進退關頭。賴其主持。日者忽聞出代督師之命。衆心惶惑。未識所措。雖淮揚係南都門戶。畢竟朝廷是天下根本。若可法在朝。則出師命將。真可取燕雲而復帝都。固本安民。奚但保江淮而全半壁。淮揚雖急。宜別命一督臣。使可法從中調度。則兵糧有著。著應手之模。萬一可法自行。則雖身任督師。而中樞已更成局。實戰守有事。事紛擾之漸。卽後起必有善圖。而前功不無變廢。機會一失。局面盡移。此江南士民所以奔走號呼。不能不伏闕哀籲者也。且近日民間傳言。降賊逃官。紛紛南至。如陳名夏項煜諸人。旣以身受僞官。覩顏事賊。乃復出頭露面。儼列朝班。甚有陰奉賊指。愿効奸細。展轉夤緣。復職誤國。當此風鶴未定之餘。又有此烏爵來奔之異。忽爾重臣出外。樞務變更。其何能息此危疑之情也。伏乞陛下仍留可法在朝佐理。一如前旨。別命才望重臣。或現任。或起廢。毅然肯行者。前赴淮安。以圖進勦。仍將逃回諸臣。察其曾受僞職者。戮諸東市。其未受僞職者。投諸荒裔。蓋此番不死諸臣。與唐天寶之事不同。彼時天子自去西川。太子速興靈武。臣下無必死之條。君父有可寬之例。今先帝賓天。六宮掃地。乾坤何等時也。但聞主辱卽當臣死。未聞主死尙可臣生。此宜亟正典刑。毋滋淆惑。以救人心。以扶正氣者也。懇祈陛下大察天下之勢。俯順士民之情。旣重根本贊化之人。兼濟門庭進退之策。戮有罪而任有能。專大任而定國是。庶幾中興之業可成。而漢光唐肅得再見於今日也。某等無任瀝血披誠。籲天哀祈之至。爲此連名具本。伏闕具奏。以聞。

書殉揚州事

黎士宏

乙酉四月初一日。閣部史公在揚州。聞大兵信。急督師往泗州防守。後六日。朝命輔臣史可法。藩鎮黃得功等。星夜提兵渡江。以禦左兵。公於初九日抵浦口。復奉命黃得功等渡江。史可法仍守揚。泗公馳至。泗而總兵官李遇春等已降。公乃同副將史德威。率數千騎回揚。泣諭士民登陴爲死守計。十五日。豫親王率兵至城下。使降將李遇春說降。公令德威痛罵。遇春負國背恩。王使鄉約捧令旨至濠邊。公曰。吾爲朝廷首輔。豈肯反面事人。遂縋健卒二人。取令旨鄉約投諸水。遇春奔回告王。王乃以書來。公復書不屈。如故。十七日。又接王書者五。皆不復啓視。投之水。乃監軍道高岐鳳。總兵官李棲鳳。又踰城降。公知事不可爲。十八日。呼德威入內。持之慟哭。誓死報國。欲以德威爲後嗣。德威伏地泣曰。相公爲國殺身。義當同死。何敢偷生。然德威自有宗支。况無父母命。安得爲人後。公泣曰。我爲我國亡。子爲我家存。我以父母大事屬子。子可勿辭。時總兵劉肇基等同侍公側。亦交口泣勸。公泣拜德威曰。爲我祖宗父母計。我不負國。子忍負我。德威始泣拜受命。公遂繕遺表上朝廷。又爲書五封。一致某王。一上太夫人。一遺夫人。一遺叔父兄弟。一付德威。屬以譜入宗嗣。寄託後事。虛軍中有失。重寫如前。付僕李書收存。又囑德威云。我死當葬於太祖高皇帝孝陵之側。二十日。王復以書來。公拒之益堅。二十五日。兵攻城急。公令以礮擊。傷者頗衆。王親督勁卒。疾攻城西北角。城且陷。公知事已去。乃與德威訣別。舉刃自刎。參將許謹泣抱之。血濺衣袂。而未殊。公仍令德威加刃。德威不忍。同謹率數十人擁公下城。公罵之。至小東門。謹中箭死。公問前驅爲

誰德威言是豫王公大呼云。史可法在此。衆驚愕。執赴新城門樓上。王以禮待之。稱先生曰。忠義旣成。今爲我收拾江南。當不惜重任。公怒曰。吾爲天朝重臣。豈可苟且偷生。作萬世罪人。吾頭可斷。身不可屈。願速死。從先帝於地下。德威持遺書。走城中。旌忠寺寄藏。復回見公。與王語詞色益厲。王曰。旣爲忠臣。當殺之以全其名。公厲聲曰。城亡與亡。我意已決。卽劈屍萬段。甘之如飴。但揚城百萬生靈不可殺戮。遂慨然授命。德威被執至營。發往許定國處。訊嗣公眞贗。得實。王令釋之以全忠臣後嗣。五月初七日。德威回揚。入城尋公屍。時炎熱方熾。載骸塞路。腐變不可識。爰奉公袍笏。招魂葬於揚州城北梅花嶺右。立碑封坎而去。德威山西平陽人。余見揚州殉節紀略。謹述其實。以備史氏之采云。

功德記

張斯善

明季寇逆猖熾。毒流楚豫間。當軸以皖城爲故都。上游議設兵備。制寇使不得南下。一時草創。百務紛舉。而命官之議報可。舉朝視爲畏途。時史公任比部郎。奮然起曰。國家養士。原爲社稷封疆計。今若此。非所以報主知也。自請往。至皖日。不暇給。築城濬濠。措餉募兵。月餘。得八百人。雖訓練未深。而戰守有恃。皖遂爲江北一重鎮矣。丁丑。兵燹益烈。兵單莫支。復議增設撫臣。以爲豫楚聲援。開府於六。廷臣推公。爰晉階焉。其草創更甚於備皖時。公甫下車。舉開遠湯公代兵備。公乃露宿行間。凡所經畫。不減古名將方略。以故賊出沒靡常。而六無恙。江北諸城無恙。因而故都亦無恙。公之功大矣。終歲一衣蔬食自足。開禮賢館。廣咨問。爲德若不足。念差徭之害。所在皆然。而六尤劇。公視狡僧嗾民者如讐。擊殺數輩。其時赫然維新。兩郡十四屬之民。始得帖席而臥。簽點法相沿日久。差之中有養馬一條。計六應供馬二十六匹。值用兵之日。游騎四出。所謂大府援鎮。飛來食人馬。差一至。坐索無已。往往中人之產立盡。六民困甚。籲於公。公愀然曰。條鞭法天下皆然。而六仍點差之陋。抑何爲者。於是允所請。差歸於官。而里民佐其費。勒石垂久。至今六人賴焉。公麾下卒多秦晉人。類皆獷悍不率。內有驍丁蘇姓者。以細故射殺老嫗。公杖殺之。其黨劉小全馬如龍。倡言作亂。密邀百人噪於軍。時漏下三刻。亂兵自外入。城內數處火起。公詢知其故。檢章疏文。移有關撫事者。付幹掾數人。命攜之踰垣避。掾乞請同死。公曰。無庸也。汝輩所付皆係軍國。不可以失。揮令亟去。內有一小侍亡其姓名。曰奴願隨公。公義而留之。朱衣坐堂上。秉燭仗劍。亂者趨至門。見公

神光照人。端嚴可憚。遂斂手而竄。昧旦。關川兵討平之。公素服慰士民曰。無功於六。而且害之。卽移軍郊外。以謝百姓。士民扳挽而泣。伏地叩留。額有出血者。公檢被焚之家。每屋一間。賑銀五兩。少選亂定。兵民安堵如初。戊寅夏。飛蝗自西北來。若雲密雨驟。公命官民捕之。死蝗山積。而害未減。公每於子夜跪禱。爲民請命。凡焚香盡三炷而達曙。如是者彌月。其掾請曰。得毋勞乎。公曰。余做秀才時。合一月計之。止得七夜整眠。自服官來。惰矣。此何足言疲。但恐罔所濟耳。庚辰春。大疫。道上僵屍枕藉。公措米千餘擔。分設粥廠九處。活饑民無數。六民戴公德。建碑祠。歲時祝焉。無何。聞太公訃。公哭泣毀容。水漿不入口。士民環裾請曰。太公以天年終。公其爲朝廷自愛。不得已進一粥焉。弔者曰。衆雖部民。賤隸必叩答之。及去。朝廷聞其賢而未信也。遣中涓數人。先於涿州伺之。比至。啓其篋。得銀盃二。金扇十七柄。璽章三十二軸而已。使者報聞。帝爲動容。於是有奪情議。公拜疏固辭。服闋。授七省總漕。尋晉南司馬。後視師維揚。卒。以身殉。夫大廈非一木所支。大才非其時則蹶。心能不媿。行足見天。以云無負所生焉可矣。善。六人言其所見聞如此。

六安生祠記

宋之正

今上聖神文武克詰張皇計戡定遠猶必先肅清近服顧茲關雒氛祲纏延楚豫歲乙亥始肆蹂躪江以北西來則六當其衝東南伺則潛太作之徑廟謨宏遠特開六廡憲府授節鉞以重撻伐之權維丁丑大中丞史公實肇膺簡任焉公濟寧致遠惟神惟幾蓋自兵備皖上業稱三軍之司命兆姓之憑依六雖天幸分隸然藁爾殘區何以親日月霑雨露爲子遺迓續乎乃公經猷素裕更跋涉周觀稔知六爲襟喉門戶地遂移纛於斯鷹揚虎賁距躍推雄葦布星羅營壘增勝猶日募遼陝之奇材市汧渭之駿足彙集幕下公時時簡閱而肄習之方略節制先聲隱然敵國草剋新模度越尋常萬萬矣軍實益盛敵愾當自無前每一聞警莫不介馬而馳之六舒桐黃之交袤延幾及千里賊屢入屢創而板山諸險奧屢戰獲俘公臨陣身先士卒謀勇用命所向無堅露布曾不自侈彼醜維馘繇是無復長驅廬和壽濠間往日窺伺之路頓絕此其績著陵京動施社稷者未易縷指獨是六蒙過化功德與高厚等銜恩思報有自來也六恬嬉日久民不知兵狡賊突臨駢首就戮公建六安營用專捍禦更酌濟餉稽長策地方無執戈之苦有保聚之安賊不致走城下如無人而城中亦倚爲耳目壯聲援年來婦子免鋒鏑者何啻千萬城垣傾圮易板易城遙覘豕蛇士民日夕皇皇公捐俸修登佐以節省之資費不下二千金而不煩公帑不括民貲且躬親閱視卽一甑一石數目寓而心經焉不日之成悉爲堅壘長城屹若垂保障於無疆烽鏑類仍絃誦幾輟公首臨頒宮集諸生而與進之重之咨詢接以溫文中有稍知自砥者尤加優異凡屬子衿蒸蒸色

動。觀宮牆之未飾。復捐助繕營。時值凶災。心驚雲漢。公虔忱步禱。甘澍時濡。重以螟螣害稼。分方募捕。婢獨嗷嗷。設糜哺之。穀價騰湧。立諭疏之。酌盈濟虛。至誠動物。一方民獲免溝中之瘠。猶存守望之身。秋毫皆公力也。軍興孔亟。承役者雖富室亦盡。張威肆虐。民命不堪。公嚴爲禁戢。使不得橫索而狂逞焉。郵次望風斂迹。兼允士民臚言。勒成一條鞭冊。賦役適均。更有相沿陋規。立石刊除。里甲賴以存活。積猾交蟠。侵漁錢穀。以數萬計。公寘首惡於理。舞文輩始知惕息。奸蠹縱橫。屠毒良善。公廉得其實。刑一人而千萬人懼。其諸濟惡以次芟除。六惡犯賊久累貧民。破產者不勝屈數。公特疏請免。波及之衆。歡若更生。彈丸瘠土。荐罹兵凶。公約己裕民。泊無一嗜。夙夜寅清。焚香靜對。一惟君國是急。精敏絕人。事無鉅細。咸屬親裁。目視耳聽。口答手批。靡不瞻舉。而始終略無少倦。綢繆蚤定。惟儲糧爲急。時荐饑見告。兵民一時皇然。卽以所儲給軍。而令不得與民爲市。以杜爭端。更念大旅狎至。空匱莫支。敲扑徒煩。庚癸莫戢。仍預檄撫屬諸郡邑。協助恆近萬金。貯之六庫。驛騷雖劇。應之裕如焉。公本原澄徹。神明日生。撫摩肺篤。經慮彌遠。古大臣匪躬之致。先事之防。庶幾見之。入衛整旅。星馳電發。所將率彪虎熊熊。平日頗悚於繩束。迨久行間。見公糲餐。蓐寢。有最下士所不甘者。始相與感而泣下。願爲効死。方鼓厲待敵。而太封公訃聞矣。公慟幾絕。水漿不御者。更四晨昏。勉徇輿情。稍進匕粥。雖毀頓之餘。惓惓惟圖善厥後耳。是時公請得憲使湯公。詰戎貞憲。一力同心。裨於安攘者甚大。遂與今大中丞鄭公並舉自代。而新命已有先符矣。蕭規曹隨。較若畫一。爲國爲民。功德更稱不朽。公今銜恤歸。垂髮戴白。炷香扳號者。彌滿川谷。迄今孺子婦人。無不

見公之真。勇夫悍卒。無不懷公之德。洵古今未有者。士若民僉謀脩俎豆。祝萬年。然仰體素心。未敢驟。又未能已。爰就駐節近地。櫪宇是營。俾歲時瞻覲。宛若公坐堂皇。布德意。撫綏麾指。爲元元拯阽危也。想公密邇天顏。時當簡在。爰立左右。用叶爲霖。不遐遺此一隅。草野中方以下平治云。祠經始於崇正十二年十二月十五日。落成於十三年三月八日。是役也。俯順羣心。先謀基定。實稟度於憲使湯公。而新任朱州守。心切景行。經圖締建。用襄厥成焉。公名可法。字憲之。號道鄰。順天府大興縣籍。開封府祥符縣人。戊辰進士。

墓祠記

謝啓昆

今天子御極之三十年。余以編修入史館。方續纂綱目。欽奉上諭以明福王之在江寧。尙與宋南渡相彷彿。

特命存福王年號。而於其臣史閣部可法。復有方嘉予之之諭。其時讀者無不仰見我皇上褒忠節。正名分。一秉春秋之律。而未嘗不嘆史公之心跡得大白於輿朝。爲千載一時之遇也。揚州廣儲門外梅花嶺。右有史公葬衣冠墓。歲甲午。余守揚州。拜墓下。見松柏鬱然。祠宇斬新。問之。或曰官構也。又云。其子孫自爲之。余喜公之果有後也。未幾其裔孫開純。奉公文集來謁。卽史所稱奉遺命爲後副將史德威之曾孫也。集後載黎士宏書公殉揚州事云。公在園中。命家人李書曰。我死當葬高皇陵側。城破公自刎不殊。史德威等昇之。至小東門見執公呼曰。我史督師也。遂擁之去。善諭之。不屈。求死。因被殺。德威自白奉遺命爲後。釋之。越十餘日。德威尋公屍。腐變不可識。奉公袍笏葬於嶺。與史文相同。或者曰。德威奉公遺命葬鍾陵。公之精魄。其不戀戀於揚州可知也。雖然。揚民實感公德。當是時。四鎮爭長。高傑駐揚州。抄掠徧城野。憤者至並鄉官鄭元勳誣殺之。朝命公往。傑乃聽命。公爲屯其衆於瓜洲。衛允文督興平軍。與黃得功構。賴公遣官馳解之。揚民乃安。是揚之遺黎。皆公之生之也。卽無墓。猶當世世祀公。況衣冠所瘞。肝腦所塗。乃在此土耶。則崇其祠宇也固宜。開純言其曾祖德威。本籍山右。葬公袍笏。歸山右終焉。越數十年。純父某始來揚。土人侵公墓地。白於官。清還故址。以前運使朱公請列於祀典。乾隆戊子。純請於前運使。

蔣公鄭公得帑金建祠三楹。今又請於運使邊公。上鹽院伊公。復修置門樓三楹。甃垣以磚七十丈。其近墓餘地。皆純父子。前後用公私錢。擴置手植松柏梅花。今皆成林。以余有守土責。請余記之。嗚呼。公之生也。義能得士以庇其後。公之死也。忠能動天以存其君。往古忠節之士。其身後未有如公者。豈其天性過人歟。抑所遭有幸不幸也。余既喜於續纂綱目。輯公事蹟。今又來守是邦。而親見祠之成也。於是書其事而爲之記。乾隆四十年十月。

後序

乾隆乙未之冬十月。先忠正公仰蒙天子褒忠賜諡。越二年丁酉。戶部侍郎彭公以公遺像進呈。恭奉宸翰題詩一章。以御製書事文命大學士于公敏中書之像端。而錄公上攝政王書於後。並命摹鑄祠壁。以垂久遠。

奎章炳煥。昭茲來許。誠亘古以來未有之盛典也。庚子甲辰。翠華南幸。特遣大臣于公祠墓奠酒。聖澤頻頒。褒榮已極。公其可不待文章傳矣。伏念公孤忠亮節。載在史志。當誓師勤王時。凡奏疏筆札。皆足以見慷慨致命之志。今天子特予褒揚。俾垂奕禩。純爲孫子。顧敢漠然已乎。公之大節。固不待文章傳。然亦散佚不可多得。謹就先府君所付遺稿。分編列爲四卷。敬繕宸章。冠諸卷首。而以史志記贊題辭附焉。編次既定。付之剞劂。益幸遭逢聖主。爲千載一時云。甲辰孟夏。元孫開純敬識。

中華民國廿六年九月拾日收到



編主五雲王

編初成集書叢

集 公 正 忠 史

錄 附

中華民國二十五年十二月初版

徐

著 者 史 可 法

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠



3
4
2171